

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं ॥

कृष्ण यजुर्वेदीय तैत्तिरीय संहिता

पद पाठः (वाक्य सहित)

द्वितीयकाण्डे प्रथमः प्रश्नः

Notes:

- Please refer to the book “TS Kandam 1” and “TS 1.1 Pada Paatam with Vaakyam” for notes and conventions used in this Compilation.
- Please download our vedic compilations from our web site www.vedavms.in.

Contents

2 कृष्ण यजुर्वेदीय तैत्तिरीय संहितायं पद पाठे द्वितीयं काण्डं.....3

2.1 द्वितीयकाण्डेप्रथमः प्रश्नः – पशुविधानं.....3

ओं नमः परमात्मने, श्री महागणपतये नमः, श्री गुरुभ्यो नमः

हरिःओं

2 कृष्ण यजुर्वेदीय तैत्तिरीय संहितायं पद पाठे

द्वितीयं काण्डं

2.1 द्वितीयकाण्डेप्रथमः प्रश्नः – पशुविधानं

2.1.1.1

वा॒यव्य॑ श्वे॒तमा॑ ल॒भेत॑ भू॒तिकामो॑ वा॒युर्वै॑ क्षे॒पिष्ठा॑ दे॒वता॑वा॒युमे॒व
स्वे॒न भा॒गधे॒येनो॑प॒ धाव॑ति स ए॒वैनं॑ भू॒तिं ग॑मयति॒ भव॑त्ये॒वा-ति॑क्षि॒प्रा
दे॒वते॑त्याहुः॒ सैन॑मीश्वरा प्र॒दह॑ इत्ये॒तमे॒व स॑न्तं वा॒यवे॑ नि॒युत्व॑त
आ ल॒भेत॑ नि॒युद्धा॑ अस्य॒ धृति॑र्धृ॒त ए॒व भू॒तिमु॒पैत्य॑ प्र॒दाहा॑य
भव॑त्ये॒व - [] 1

2.1.1.1 (Padam)

वा॒यव्य॑म् । श्वे॒तम् । ए॒ति । ल॒भेत॑ । भू॒तिकाम॑ इति॒ भूति॑-कामः ।
वा॒युः । वै । क्षे॒पिष्ठा॑ । दे॒वता॑ । वा॒युम् । ए॒व । स्वे॒न ।

भाग॑धे॒येने॑ति भा॒ग – धे॒येन॑ । उ॒पेति॑ । धा॒वति॑ । सः । ए॒व । ए॒नम् ।
 भू॒तिम् । ग॒मय॑ति । भ॒वति॑ । ए॒व । अ॒ति॒क्षि॒प्रेत्य॑ति – क्षि॒प्रा । दे॒वता॑ ।
 इति॑ । आ॒हुः । सा । ए॒नम् । ई॒श्वरा॑ । प्र॒दह॑ इति॑ प्र-द॒हः । इति॑ ।
 ए॒तम् । ए॒व । स॒न्तम् । वा॒यवे॑ । नि॒युत्व॑त इति॑ नि-यु॒त्वते॑ । ए॒ति ।
 ल॒भेत॑ । नि॒युदि॑ति नि – यु॒त् । वै । अ॒स्य । धृ॒तिः । धृ॒तः । ए॒व ।
 भू॒तिम् । उ॒पेति॑ । ए॒ति । अ॒प्र॒दाहा॑येत्य॒प्र – दा॒हाय॑ । भ॒वति॑ ।

ए॒व । 1 (50)

2.1.1.2

वा॒यवे॑ नि॒युत्व॑त आ ल॒भेत॑ ग्रा॒मका॑मो वा॒युर्वा इ॒माः प्र॒जा न॑स्यो॒ता
 ने॒नीय॑ते वा॒युमे॒व नि॒युत्व॑न्त॒ स्वेन॑ भा॒गधे॒येनो॑प धा॒वति॑ स ए॒वास्मै॑
 प्र॒जा न॑स्यो॒ता नि॒यच्छ॑ति ग्रा॒म्ये॒व भ॒वति॑ नि॒युत्व॑ते भ॒वति॑ ध्रु॒वा
 ए॒वास्मा॑ अन॒पगाः॑ करो॒ति वा॒यवे॑ नि॒युत्व॑त आ ल॒भेत॑ प्र॒जाका॑मः
 प्रा॒णो वै वा॒युरपा॑नो नि॒युत् प्रा॑णापा॒नौ ख॒लु वा ए॒तस्य॑ प्र॒जाया॑-[] 2

2.1.1.2 (Padam)

वा॒यवे॑ । नि॒यु॒त्व॒त इति॑ नि – यु॒त्व॒ते । ए॒ति । ल॒भे॒त । ग्रा॒म॒का॒म इति॑
ग्रा॒म – का॒मः । वा॒युः । वै । इ॒माः । प्र॒जा इति॑ प्र – जाः ।
न॒स्यो॒ता इति॑ न॒सि – ओ॒ताः । ने॒नी॒य॒ते । वा॒यु॒म् । ए॒व ।
नि॒यु॒त्व॒न्त॒मि॒ति नि॒यु॒त्व॒न्त॒म् । स्वे॒न । भा॒ग॒धे॒ये॒ने॒ति भा॒ग – धे॒ये॒न ।
उ॒पे॒ति । धा॒व॒ति । सः । ए॒व । अ॒स्मै । प्र॒जा इति॑ प्र – जाः ।
न॒स्यो॒ता इति॑ न॒सि – ओ॒ताः । नी॒ति । य॒च्छ॒ति । ग्रा॒मी । ए॒व ।
भ॒व॒ति । नि॒यु॒त्व॒त इति॑ नि॒यु॒त्व॒ते । भ॒व॒ति । ध्रु॒वाः । ए॒व । अ॒स्मै ।
अ॒न॒प॒गा इत्य॑न॒प – गाः । क॒रो॒ति । वा॒यवे॑ । नि॒यु॒त्व॒त इति॑
नि – यु॒त्व॒ते । ए॒ति । ल॒भे॒त । प्र॒जा॒का॒म इति॑ प्र॒जा – का॒मः ।
प्रा॒ण इति॑ प्र॒नः । वै । वा॒युः । अ॒पा॒न इत्य॑प – अ॒नः ।
नि॒यु॒दि॒ति नि – यु॒त् । प्रा॒णा॒पा॒ना॒वि॒ति प्रा॒ण – अ॒पा॒नौ । ख॒लु । वै ।
ए॒त॒स्य । प्र॒जा॒या इति॑ प्र – जा॒याः । 2 (50)

2.1.1.3

अप॑ क्राम॑तो योऽलं॑ प्र॒जायै॑ सन् प्र॒जां न वि॒न्दते॑ वा॒युमे॒व नि॒युत्व॑न्तः॒
स्वेन॑ भा॒गधे॑येनोप॑ धाव॑ति स ए॒वास्मै॑ प्रा॒णापा॑नाभ्यां॑ प्र॒जां प्र
जन॑यति वि॒न्दते॑ प्र॒जां वा॒यवे॑ नि॒युत्व॑त आ ल॒भेत॑ ज्यो॒गाम॑यावी
प्रा॒णो वै वा॒युर॑पा॒नो नि॒युत् प्रा॑णापा॒नौ खलु॑ वा ए॒तस्मा॑ दप॒क्राम॑तो
यस्य॑ ज्यो॒गाम॑यति वा॒युमे॒व नि॒युत्व॑न्तः॒ स्वेन॑ भा॒गधे॑येनोप॑ – [] 3

2.1.1.3 (Padam)

अपे॑ति । क्राम॑तः । यः । अल॑म् । प्र॒जाया॑ इति प्र – जा॑यै । सन् ।
प्र॒जामि॑ति प्र – जा॑म् । न । वि॒न्दते॑ । वा॒युम् । ए॒व ।
नि॒युत्व॑न्तमि॑ति नि – यु॒त्वन्त॑म् । स्वेन॑ । भा॒गधे॑येनेति॑ भा॒ग-धे॑येन ।
उपे॑ति । धाव॑ति । सः । ए॒व । अ॒स्मै । प्रा॒णापा॑नाभ्यामि॑ति
प्रा॒ण-अ॒पा॒नाभ्या॑म् । प्र॒जामि॑ति प्र – जा॑म् । प्रे॑ति । जन॑यति ।
वि॒न्दते॑ । प्र॒जामि॑ति प्र – जा॑म् । वा॒यवे॑ । नि॒युत्व॑त इति॑ नि-यु॒त्वते॑ ।
ए॒ति । ल॒भेत॑ । ज्यो॒गाम॑यावीति॑ ज्योक् – आ॒मया॑वी । प्रा॒ण इति॑
प्र – अ॒नः । वै । वा॒युः । अ॒पा॒न इत्य॑प – अ॒नः ।

नियुदिति नि – युत् । प्राणापानाविति प्राण-अपानौ । खलु । वै ।
एतस्मात् । अपेति । कामतः । यस्य । ज्योक् । आमयति । वायुम् ।
एव । नियुत्वन्तमिति नि – युत्वन्तम् । स्वेन ।
भागधेयेनेति भाग-धेयेन । उपेति । 3 (50)

2.1.1.4

धावति स एवास्मिन् प्राणापानौ दधात्युत यदीतासुर्भवति जीवत्येव
प्रजापतिर्वा इदमेक आसीत् सोऽकामयत प्रजाः पशून् सृजेयेति
स आत्मनो वपामुदक्खिदत् तामग्नौ प्रागृह्णात् ततोऽजस्तूपरः
समभवत् त७ स्वायै देवताया आ ऽलभत ततो वै स प्रजाः
पशूनसृजत यः प्रजाकामः – [] 4

2.1.1.4 (Padam)

धावति । सः । एव । अस्मिन् । प्राणापानाविति प्राण – अपानौ ।
दधाति । उत । यदि । इतासुरितीत-असुः । भवति । जीवति । एव ।
प्रजापतिरिति प्रजा – पतिः । वै । इदम् । एकः । आसीत् । सः ।
अकामयत । प्रजा इति प्र – जाः । पशून् । सृजेय । इति । सः ।

आ॒त्मनः॑ । व॒षाम् । उ॒दिति॑ । अ॒क्खि॒दत् । ताम् । अ॒ग्नौ ।
प्रे॒ति । अ॒गृह्णा॒त् । ततः॑ । अ॒जः । तू॒परः॑ । स॒मिति॑ । अ॒भवत् । तम् ।
स्वा॒यै॑ । दे॒वता॒यै॑ । ए॒ति । अ॒ल॒भत॑ । ततः॑ । वै । सः । प्र॒जा इति॑
प्र – जाः । प॒शून् । अ॒सृ॒जत॑ । यः ।

प्र॒जा॒काम॑ इति॑ प्र॒जा – का॒मः । 4 (50)

2.1.1.5

प॒शु॒का॒मः॑ स्या॒त् स ए॒तं प्रा॒जाप॒त्यम॒जं॑ तू॒पर॒मा ल॒भेत॑ प्र॒जाप॒तिमे॒व
स्वे॒न भा॒गधे॒येनो॒प धा॒वति॑ स ए॒वास्मै॑ प्र॒जां प॒शून् प्र॒जन॒यति॑
यच्छ॒मश्रु॒णस्त॒त् पु॒रुषा॒णां॑ रू॒पं य॒त् तू॒पर॒स्तद॒श्वा॒नां॑ य॒दन्य॒तो॒दन्
तद्-ग॒वां य॒दव्या॑ इ॒व श॒फास्त॒दवी॒नां॑ य॒दज॒स्त-द॒जाना॑-मे॒ताव॒न्तो॒
वै ग्रा॒म्याः प॒शव॒स्तान् – [] 5

2.1.1.5 (Padam)

प॒शु॒का॒म इति॑ प॒शु – का॒मः । स्या॒त् । सः । ए॒तम् । प्रा॒जाप॒त्यमि॒ति
प्रा॒जा – प॒त्यम् । अ॒जम् । तू॒परम् । ए॒ति । ल॒भेत॑ । प्र॒जाप॒तिमि॒ति
प्र॒जा – प॒तिम् । ए॒व । स्वे॒न । भा॒गधे॒येने॒ति भा॒ग – धे॒येन॑ । उ॒पेति॑ ।

धा॒वति॑ । सः । ए॒व । अ॒स्मै । प्र॒जा॒मि॒ति॑ प्र-जा॒म् । प॒शून् । प्रे॒ति॑ ।
ज॒न॒य॒ति॑ । यत् । इ॒म॒श्रु॒णः । तत् । पु॒रु॒षा॒णाम् । रू॒पम् । यत् ।
तू॒परः॑ । तत् । अ॒श्वा॒नाम् । यत् । अ॒न्यतो॑ द॒न्नित्य॒न्यतः॑ – द॒न् । तत् ।
ग॒वाम् । यत् । अ॒व्याः । इ॒व । श॒फाः । तत् । अ॒वी॒नाम् । यत् ।
अ॒जः । तत् । अ॒जा॒नाम् । ए॒ता॒व॒न्तः । वै । ग्रा॒म्याः ।
प॒श॒वः । तान् । 5 (50)

2.1.1.6

रू॒पे॒णै॒वा॒व रु॒न्धे सो॒मा॒पौ॒ष्णं त्रै॒त॒मा ल॒भे॒त प॒शु॒का॒मो॒द्वौ वा अ॒जा॒यै
स्त॒नौ ना॒नै॒व द्वा॒व॒भि जा॒ये॒ते ऊ॒र्जं पु॒ष्टिं तृ॒तीयः॑ सो॒मा॒पू॒षणा॑वे॒व स्वे॒न
भा॒ग॒धे॒ये॒नो॒प धा॒वति॑ ता॒वे॒वा॒स्मै प॒शून् प्र॒ज॒न॒य॒तः सो॒मो वै रे॒तो॒धाः
पू॒षा प॒शूनां॑ प्र॒ज॒न॒यि॒ता सो॒म ए॒वा॒स्मै रे॒तो द॒धा॒ति पू॒षा प॒शून् प्र
ज॒न॒य॒त्यौ॒दु॒म्ब॒रो यू॒पो () भ॒व॒त्यू॒र्वा उ॒दु॒म्ब॒र ऊ॒र्क् प॒श॒व ऊ॒र्जै॒वा॒स्मा
ऊ॒र्जं प॒शू॒न॒व रु॒न्धे । 6

2.1.1.6 (Padam)

रूपेण॑ । ए॒व । अ॒वेति॑ । रु॒न्धे । सो॒मापौ॑ष्णमि॒ति सो॒मा – पौ॑ष्णम् ।
त्रै॒तम् । ए॒ति । ल॒भेत॑ । प॒शुकाम॑ इति प॒शु – का॒मः । द्वौ । वै ।
अजा॑यै ॥ स्त॒नौ ॥ ना॒ना ॥ ए॒व । द्वौ । अ॒भीति॑ । जा॒येते॑ इति ।
ऊ॒र्जम् ॥ पु॒ष्टिम् ॥ तृ॒तीयः॑ । सो॒मापू॑षणा॒विति॑ सो॒मा – पू॒षणौ ॥ ए॒व ।
स्वे॒न । भा॒गधे॑ये॒नेति॑ भा॒ग – धे॑ये॒न । उ॒पेति॑ । धा॒वति॑ । तौ । ए॒व ।
अ॒स्मै । प॒शून् । प्रे॒ति । ज॒नय॑तः । सो॒मः । वै । रे॒तो॒धा इति॑
रे॒तः – धाः॑ । पू॒षा । प॒शूना॑म् । प्र॒ज॒नयि॑तेति॒ प्र – ज॒नयि॑ता । सो॒मः ।
ए॒व । अ॒स्मै । रे॒तः । द॒धाति॑ । पू॒षा । प॒शून् । प्रे॒ति । ज॒नय॑ति ।
औ॒दु॒म्बरः॑ । यू॒पः () । भ॒वति॑ । ऊ॒र्क् । वै । उ॒दु॒म्बरः॑ । ऊ॒र्क् ।
प॒शवः॑ । ऊ॒र्जा । ए॒व । अ॒स्मै । ऊ॒र्जम् ॥ प॒शून् ।
अ॒वेति॑ । रु॒न्धे । 6 (63) (अ॒प्र॒दा॒हाय॑ भ॒वत्ये॑व – प्र॒जाया॑ – आ॒मय॑ति
वा॒युमे॑व नि॒यु॒त्व॒तः॑ स्वे॒न भा॒गधे॑ये॒नोप॑ – प्र॒जा॒काम॑ – स्ता॒न् –
यू॒प – स्त्र॑यो॒दश॑ च) (A1)

2.1.2.1

प्र॒जाप॑तिः प्र॒जा अ॑सृज॒त ता अ॑स्मात् सृ॒ष्टाः परा॑चीरायन् ता
वरु॑णमगच्छन् ता अ॒न्वैत् ताः पुन॑रयाच॒त ता अ॑स्मै न पुन॑रद॒दात्
सोऽब्र॑वीद्-वरं वृ॒णीष्व॑ मे पुन॑र्देहीति तासां वर॑मा ऽल॑भत स
कृ॒ष्ण एक॑शितिपाद-भव॒द्यो वरु॑ण गृहीतः स्यात् स ए॒तं वा॑रुणं
कृ॒ष्ण-मेक॑शितिपादमा-ल॒भेत वरु॑ण - [] 7

2.1.2.1 (Padam)

प्र॒जाप॑तिरिति प्र॒जा - प॒तिः । प्र॒जा इति॑ प्र - जाः । अ॒सृज॒त ।
ताः । अ॒स्मात् । सृ॒ष्टाः । परा॑चीः । आ॒यन् । ताः । वरु॑णम् ।
अ॒गच्छ॑न् । ताः । अ॒न्विति॑ । ऐ॒त् । ताः । पुनः॑ । अ॒याच॑त । ताः ।
अ॒स्मै । न । पुनः॑ । अ॒ददा॑त् । सः । अ॒ब्रवी॑त् । वर॑म् । वृ॒णीष्व ।
अथ॑ । मे । पुनः॑ । दे॒हि । इति॑ । तासा॑म् । वर॑म् । एति॑ । अ॒लभ॑त ।
सः । कृ॒ष्णः । एक॑शितिपादित्येक - शिति॒पात् । अ॒भव॑त् । यः ।
वरु॑णगृहीत इति वरु॑ण - गृही॒तः । स्या॑त् । सः । ए॒तम् ।
वा॒रुण॑म् । कृ॒ष्णम् । एक॑शितिपादमित्येक - शिति॒पाद॑म् । एति॑ ।

ल॒भेत॑ । वरु॒णम् । 7 (50)

2.1.2.2

–मे॒व स्वे॑न॒ भा॒ग॒धे॒ये॒नो॒प॒ धा॒वति॑ स ए॒वैनं॑ वरु॒णपा॑शान् मुञ्चति
कृ॒ष्ण एक॑शितिपाद्–भवति॑ वारु॒णो ह्ये॒ष दे॒वत॑या॒ समृ॑द्ध्यै
सुव॑र्भानुरासुरः॒ सूर्यं॑ तम॒साऽवि॑द्ध्यत् तस्मै॒ दे॒वाः प्रा॑यश्चि॒त्ति–मै॒च्छन् तस्य॑
यत् प्र॒थमं॑ तमो॒ऽपा॒घ्नन्थ॑सा कृ॒ष्णाऽवि॑रभवद्–यद् द्वि॒तीयं॑ सा फल्गु॒नी
यत् तृ॒तीयं॑ सा ब॒लक्षी॑ यदध्य॒स्था–द॒पाकृ॑न्तन्थ॒सा ऽवि॑र्वशा – [] 8

2.1.2.2 (Padam)

ए॒व । स्वे॑न॒ । भा॒ग॒धे॒ये॒नेति॑ भा॒ग – धे॒ये॒न । उ॒पेति॑ । धा॒वति॑ । सः ।
ए॒व । ए॒नम् । वरु॒णपा॑शादिति॑ वरु॒ण – पा॑शात् । मु॒ञ्चति॑ । कृ॒ष्णः ।
एक॑शितिपा॒दित्ये॒क – शि॒तिपा॑त् । भ॒वति॑ । वा॒रुणः॑ । हि । ए॒षः ।
दे॒वत॑या । समृ॑द्ध्य॒ इति॑ सम् – ऋ॒द्ध्यै । सुव॑र्भानुरिति॑
सुवः॑ – भा॒नुः । आ॒सुरः॑ । सूर्य॑म् । तम॒सा । अ॒वि॒द्ध्यत् । तस्मै॑ ।
दे॒वाः । प्रा॑यश्चि॒त्तिम् । ऐ॒च्छन् । तस्य॑ । यत् । प्र॒थमम् । तमः॑ ।

अपा॒घ्नन्नि॒त्यप॒ – अ॒घ्नन् । सा । कृ॒ष्णा । अ॒विः । अ॒भ॒वत् । यत् ।
द्वि॒तीय॑म् । सा । फ॒ल्गु॒नी । यत् । तृ॒तीय॑म् । सा । ब॒ल॒क्षी । यत् ।
अ॒ध्य॒स्थादि॒त्यधि॑ – अ॒स्थात् । अ॒पाकृ॑न्त॒न्नित्य॑प – अ॒कृ॑न्त॒न् । सा ।
अ॒विः । व॒शा । 8 (50)

2.1.2.3

स॒म॒भ॒वत् ते॒ दे॒वा अ॒ब्रु॒वन् दे॒वप॒शुर्वा अ॒य॑ꣳ स॒म॒भू॒त् कस्मा॑ इ॒ममा॑
ल॒फ॒स्याम॑ह इ॒त्यथ॑ वै तर्ह्य॒ल्पा पृ॒थि॒व्यासी॑-द॒जा॒ता ओष॑ध॒यस्ता॑मविं
ँव॒शामा॑दि॒त्येभ्यः॑ का॒मायाऽल॑भन्त॒ ततो॑ वा अ॒प्रथ॑त पृ॒थि॒व्य-
जा॒यन्तौष॑धयो॒ यः का॒मये॑त प्र॒थेय॑ प॒शुभिः॑ प्र प्र॒जया॑ जा॒येये॑ति स
ए॒तामविं॑ ँव॒शामा॑दि॒त्येभ्यः॑ का॒माया॑ – [] 9

2.1.2.3 (Padam)

स॒मि॒ति । अ॒भ॒वत् । ते॒ । दे॒वाः । अ॒ब्रु॒वन् । दे॒वप॒शुरि॑ति
दे॒व-प॒शुः । वै । अ॒यम् । स॒मि॒ति । अ॒भू॒त् । कस्मै॑ । इ॒मम् । ए॒ति ।
ल॒फ॒स्याम॑हे । इ॒ति । अ॒थ । वै । तर्॒हि । अ॒ल्पा । पृ॒थि॒वी ।
आसी॑त् । अ॒जा॒ताः । ओष॑ध॒यः । ता॒म् । अ॒वि॒म् । व॒शाम् ।

आ॒दि॒त्ये॒भ्यः॑ । का॒माय॑ । ए॒ति । अ॒ल॒भ॒न्त॑ । ततः॑ । वै । अ॒प्र॒थ॒त ।
पृ॒थि॒वी । अ॒जा॒य॒न्त॑ । औ॒ष॒ध॒यः॑ । यः । का॒म॒ये॒त । प्र॒थे॒य ।
प॒शु॒भि॒रि॒ति॑ प॒शु – भिः॑ । प्रे॒ति । प्र॒ज॒ये॒ति॑ प्र – ज॒या॑ । जा॒ये॒य ।
इ॒ति । सः । ए॒ता॒म् । अ॒वि॒म् । व॒शा॒म् । आ॒दि॒त्ये॒भ्यः॑ ।
का॒माय॑ । 9 (50)

2.1.2.4

ऽऽ ल॒भे॒ता ऽऽदि॒त्याने॒व का॒मः॑ स्वे॒न भा॒ग॒धे॒ये॒नो॒प धा॒व॒ति॑ त ए॒वैनं॑
प्र॒थ॒य॒न्ति॑ प॒शु॒भिः॑ प्र प्र॒ज॒या ज॒न॒य॒न्त्य॑-सा॒वा॒दि॒त्यो न व्य॒रो॒च॒त तस्मै॑
दे॒वाः प्रा॒यश्चि॒त्ति॒मैच्छ॑न् तस्मा॑ ए॒ता म॒ल्हा आ॒ल॒भ॒न्ताऽऽ*ग्ने॒यीं
कृ॒ष्ण॒ग्री॒वीꣳ सꣳहि॒ता॒मै॒न्द्रीꣳ श्वे॒तां बा॒र्ह॒स्प॒त्यां ता॒भिरे॒वास्मि॑न्
रु॒च॒म॒द॒धु॒र्यो ब्र॒ह्म॒व॒र्च॒स-का॒मः॑ स्या॒त् तस्मा॑ ए॒ता म॒ल्हा आ
ल॒भे॒ता – [] 10

2.1.2.4 (Padam)

ए॒ति । ल॒भे॒त । आ॒दि॒त्यान् । ए॒व । का॒मम् । स्वे॒न । भा॒ग॒धे॒ये॒ने॒ति॑
भा॒ग – धे॒ये॒न । उ॒पे॒ति । धा॒व॒ति॑ । ते । ए॒व । ए॒नम् । प्र॒थ॒य॒न्ति॑ ।

प॒शुभि॑रिति॒ प॒शु - भिः॑ । प्रेति॑ । प्र॒जये॑ति प्र - जया॑ । ज॒नय॑न्ति ।
 अ॒सौ । आ॒दि॒त्यः । न । वी॑ति । अ॒रो॒चत॑ । तस्मै॑ । दे॒वाः ।
 प्रा॒यश्चि॑त्तिम् । ऐ॒च्छन् । तस्मै॑ । ए॒ताः । म॒ल्हाः । एति॑ । अ॒लभ॑न्त ।
 आ॒ग्नेयी॑म् । कृ॒ष्णग्री॑वीमिति॒ कृष्ण॑ - ग्री॒वीम् । स॒ञ्हि॒तामि॑ति
 सं - हि॒ताम् । ऐ॒न्द्रीम् । श्वे॒ताम् । बा॒र्ह॒स्प॒त्याम् । ताभिः॑ ।
 ए॒व । अ॒स्मिन् । रु॒चम् । अ॒दधुः॑ । यः । ब्र॒ह्मव॑र्चस॒काम॑ इति॒
 ब्र॒ह्मव॑र्चस - का॒मः । स्यात् । तस्मै॑ । ए॒ताः । म॒ल्हाः । एति॑ ।

ल॒भेत॑ । 10 (50)

2.1.2.5

ऽऽग्नेयीं॑ कृ॒ष्णग्री॑वीञ् स॒ञ्हि॒तामै॒न्द्रीञ् श्वे॒तां बा॒र्ह॒स्प॒त्यामे॒ता
 ए॒व दे॒वताः॑ स्वे॒न भा॒गधे॑ये॒नोप॑ धावति॒ ता ए॒वास्मि॑न् ब्र॒ह्मव॑र्चसं
 दध॑ति ब्र॒ह्मव॑र्चस्यै॒व भव॑ति व॒सन्ता॑ प्रा॒तरा॑ग्नेयीं॑ कृ॒ष्ण ग्री॑वीमा ल॒भेत॑
 ग्री॒ष्मे म॒ध्यन्दि॑ने स॒ञ्हि॒तामै॒न्द्रीञ् श॒रद्व॑परा॒ह्णे श्वे॒तां बा॒र्ह॒स्प॒त्यां
 त्री॒णि वा आ॒दि॒त्यस्य॑ ते॒जाञ्सि॑ व॒सन्ता॑ प्रा॒तर्ग्री॑ष्मे म॒ध्यन्दि॑ने

शर॒द्यपरा॒ह्णे॒ याव॑न्त्ये॒व ते॒जा॑ꣳसि॒ तान्ये॒वा – [] 11

2.1.2.5 (Padam)

आग्ने॑यीम् । कृ॒ष्णग्री॒वीमि॑ति॒ कृष्ण॑ – ग्री॒वीम् । सꣳहि॑तामि॒ति॒
सं – हि॒ताम् । ऐ॒न्द्रीम् । श्वे॒ताम् । बा॒र्हस्प॑त्याम् । ए॒ताः । ए॒व ।
दे॒वताः॑ । स्व॑ेन । भा॒गधे॑येनेति॒ भाग॑-धे॒येन॑ । उ॒पेति॑ । धा॒वति॑ । ताः ।
ए॒व । अ॒स्मिन् । ब्र॒ह्मव॑र्चसमि॒ति ब्र॒ह्म – वर्च॑सम् । द॒धति॑ ।
ब्र॒ह्मव॑र्चसीति॒ ब्र॒ह्म – वर्च॑सी । ए॒व । भ॒वति॑ । व॒सन्ता॑ । प्रा॒तः ।
आग्ने॑यीम् । कृ॒ष्णग्री॒वीमि॑ति॒ कृष्ण॑ – ग्री॒वीम् । ए॒ति । ल॒भेत॑ ।
ग्री॒ष्मे । म॒ध्यन्दि॑ने । सꣳहि॑तामि॒ति सं – हि॒ताम् । ऐ॒न्द्रीम् । शर॑दि ।
अपरा॒ह्ण इ॒त्यपर॑ – अ॒ह्ने । श्वे॒ताम् । बा॒र्हस्प॑त्याम् । त्री॒णि । वै ।
आ॒दि॒त्यस्य॑ । ते॒जा॑ꣳसि । व॒सन्ता॑ । प्रा॒तः । ग्री॒ष्मे । म॒ध्यन्दि॑ने ।
शर॑दि । अपरा॒ह्ण इ॒त्यपर॑ – अ॒ह्ने । या॒वन्ति॑ । ए॒व । ते॒जा॑ꣳसि ।
ता॒नि । ए॒व । 11 (50)

2.1.2.6

ॐ रुन्धे सँवथ्सरं पर्यालभ्यन्ते सँवथ्सरो वै ब्रह्मवर्चसस्य प्रदाता
सँवथ्सर एवास्मै ब्रह्मवर्चसं प्र यच्छति ब्रह्मवर्चस्येव भवति
गर्भिणयो भवन्तीन्द्रियं वै गर्भ इन्द्रियमेवास्मिन् दधति सारस्वतीं
मेषीमा लभेत य ईश्वरो वाचो वदितोः सन् वाचं न वदेद्-वाग्वै
सरस्वती सरस्वतीमेव स्वेन भागधेयेनोप धावति सैवास्मिन्-[] 12

2.1.2.6 (Padam)

अवेति । रुन्धे । सँवथ्सरमिति सं – वथ्सरम् ।
पर्यालभ्यन्त इति परि – आलभ्यन्ते । सँवथ्सर इति सं-वथ्सरः ।
वै । ब्रह्मवर्चसस्येति ब्रह्म – वर्चसस्य । प्रदातेति प्र – दाता ।
सँवथ्सर इति सं – वथ्सरः । एव । अस्मै । ब्रह्मवर्चसमिति
ब्रह्म – वर्चसम् । प्रेति । यच्छति । ब्रह्मवर्चसीति ब्रह्म – वर्चसी ।
एव । भवति । गर्भिणयः । भवन्ति । इन्द्रियम् । वै । गर्भः ।
इन्द्रियम् । एव । अस्मिन् । दधाति । सारस्वतीम् । मेषीम् । एति ।
लभेत । यः । ईश्वरः । वाचः । वदितोः । सन् । वाचम् । न ।

व॒दे॒त् । वाक् । वै । सर॒स्वती । सर॒स्वती॑म् । ए॒व । स्वे॒न ।

भा॒ग॒धे॒ये॒ने॒ति॑ भा॒ग – धे॒ये॒न । उ॒पे॒ति॑ । धा॒व॒ति॑ । सा । ए॒व ।

अ॒स्मिन् । 12 (50)

2.1.2.7

वा॒चं द॒धा॒ति॑ प्र॒व॒दि॒ता वा॒चो भ॒व॒त्य॒प॒न्न॒द॒ती भ॒व॒ति॑ तस्मा॑न् म॒नु॒ष्याः॑

स॒र्वा वा॒चं व॒द॒न्त्या॒ग्ने॒यं कृ॒ष्ण॒ग्री॒व॒मा ल॒भे॒त सौ॒म्यं ब॒भ्रुं

ज्यो॒गा॒म॒या॒व्य॒ग्निं वा॑ ए॒तस्य॑ शरी॒रं ग॒च्छ॒ति॑ सो॒म॒ र॒सो यस्य॑

ज्यो॒गा॒म॒य॒त्य॒ग्ने॒रे॒वा॒स्य शरी॒रं निष्क्री॑णा॒ति॑ सो॒माद् र॒स॒मु॒त

यदी॒ता॒सु॒र्भ॒व॒ति जी॒व॒त्ये॒व सौ॒म्यं ब॒भ्रु॒मा ल॒भे॒ताऽऽग्ने॒यं कृ॒ष्ण॒ग्री॒वं

प्र॒जा॒का॒मः सो॒मो – [] 13

2.1.2.7 (Padam)

वा॒चम् । द॒धा॒ति॑ । प्र॒व॒दि॒ते॒ति॑ प्र – व॒दि॒ता । वा॒चः । भ॒व॒ति॑ ।

अ॒प॒न्न॒द॒ती॒त्य॒प॒न्न – द॒ती । भ॒व॒ति॑ । तस्मा॑त् । म॒नु॒ष्याः॑ । स॒र्वा॒म् ।

वा॒चम् । व॒द॒न्ति॑ । आ॒ग्ने॒यम् । कृ॒ष्ण॒ग्री॒व॒मि॒ति॑ कृ॒ष्ण-ग्री॒वम् । ए॒ति॑ ।

ल॒भे॒त । सौ॒म्यम् । ब॒भ्रुम् । ज्यो॒गा॒म॒या॒वी॒ति॑ ज्योक् – आ॒म॒या॒वी॒ ।

अ॒ग्नि॒म् । वै । ए॒तस्य॑ । शरी॑रम् । ग॒च्छ॒ति॒ । सोम॑म् । र॒सः । य॒स्य ।
ज्यो॑क् । आ॒मय॑ति । अ॒ग्नेः । ए॒व । अ॒स्य । शरी॑रम् ।
निष्क्री॑णातीति॒ निः – क्री॑णाति॒ । सोमा॑त् । र॒सम् । उ॒त । य॒दि ।
इ॒तासु॑रिती॒त – अ॒सुः । भ॒वति॑ । जी॒वति॑ । ए॒व । सौ॒म्यम् । ब॒भ्रुम् ।
ए॒ति । ल॒भेत॑ । आ॒ग्ने॒यम् । कृ॒ष्णग्री॑वमि॒ति कृ॒ष्ण – ग्री॒वम् ।
प्र॒जाका॑म॒ इति॑ प्र॒जा – का॒मः । सोमः॑ । 13 (50)

2.1.2.8

वै रे॒तो॒धा अ॒ग्निः प्र॒जानां॑ प्र॒जन॑यिता सोम॑ ए॒वास्मै॑ रे॒तो द॑धात्य॒ग्निः
प्र॒जां प्र॒जन॑यति वि॒न्दते॑ प्र॒जामा॑ग्ने॒यं कृ॒ष्णग्री॑वमा ल॒भेत॑ सौ॒म्यं ब॒भ्रुं
यो ब्रा॒ह्म॒णो वि॒द्याम॑नू॒च्य न वि॒रोचे॑त यदा॒ग्नेयो॑ भ॒वति॑ तेज॑ ए॒वास्मिन्
तेन॑ द॒धाति॑ यथ् सौ॒म्यो ब्र॒ह्मव॑र्च॒सं तेन॑ कृ॒ष्णग्री॑व आ॒ग्नेयो॑ भ॒वति॑
तम॑ ए॒वास्मा॑दप॒ हन्ति॑ श्वे॒तो भ॒वति॑ – [] 14

2.1.2.8 (Padam)

वै । रे॒तो॒धा इति॑ रे॒तः – धाः । अ॒ग्निः । प्र॒जा॒नामि॑ति॒ प्र – जा॑नाम् ।
प्र॒ज॒नयि॑तेति॒ प्र – ज॒न॒यि॒ता । सोमः॑ । ए॒व । अ॒स्मै । रे॒तः । द॑धाति॒ ।

अ॒ग्निः । प्र॒जामि॑ति प्र-जाम् । प्रेति॑ । ज॒नय॑ति । वि॒न्दते॑ ॥
 प्र॒जामि॑ति प्र-जाम् । आ॒ग्नेय॑म् । कृ॒ष्णग्री॑वमि॑ति कृ॒ष्ण - ग्री॒वम् ।
 एति॑ । ल॒भेत॑ । सौ॒म्यम् । ब॒भ्रुम् । यः । ब्रा॒ह्मणः॑ । वि॒द्याम् ।
 अ॒नूच्ये॑त्यनु - उ॒च्य । न । वि॒रोचे॑तेति वि - रो॒चेत॑ । यत् ।
 आ॒ग्नेयः॑ । भ॒वति॑ । तेजः॑ । ए॒व । अ॒स्मिन् । तेन॑ । द॒धाति॑ । यत् ।
 सौ॒म्यः । ब्र॒ह्मव॑र्चसमि॑ति ब्र॒ह्म - व॑र्चसम् । तेन॑ ।
 कृ॒ष्णग्री॑व इति॑ कृ॒ष्ण - ग्री॒वः । आ॒ग्नेयः॑ । भ॒वति॑ । तमः॑ ।
 ए॒व । अ॒स्मात् । अपेति॑ । ह॒न्ति । श्वेतः॑ । भ॒वति॑ । 14 (50)

2.1.2.9

रुच॑मे॒वास्मिन्॑ द॒धाति॑ ब॒भ्रुः सौ॒म्यो भ॑वति ब्र॒ह्मव॑र्चसमे॒वास्मिन्॑ त्विषिं॑
 द॒धात्या-ग्ने॑यं कृ॒ष्णग्री॑वमा ल॒भेत सौ॒म्यं ब॒भ्रुमा॑ग्नेयं कृ॒ष्णग्री॑वं
 पु॒रोधा॑याऽस्पर्ध॑मान आ॒ग्नेयो वै ब्रा॒ह्मणः॑ सौ॒म्यो रा॑ज॒न्योऽभि॑तः
 सौ॒म्यमा॑ग्नेयौ भ॒वत-स्तेज॑सैव ब्र॒ह्मणो॑भ॒यतो॑ रा॒ष्ट्रं परि॑ गृ॒ह्णात्ये॑क॒धा
 स॒मा वृ॑ङ्क्ते पु॒र ए॒नं द॑धते । 15

2.1.2.9 (Padam)

रुच॑म् । ए॒व । अ॒स्मिन् । द॒धा॒ति । ब॒भ्रुः । सौ॒म्यः । भ॒व॒ति ।
ब्र॒ह्म॒व॒र्च॒स॒मि॒ति॑ ब्र॒ह्म – व॒र्च॒स॒म् । ए॒व । अ॒स्मिन् । त्वि॒षि॒म् ।
द॒धा॒ति । आ॒ग्ने॒य॒म् । कृ॒ष्ण॒ग्री॒व॒मि॒ति॑ कृ॒ष्ण – ग्री॒व॒म् । ए॒ति॑ ।
ल॒भे॒त । सौ॒म्य॒म् । ब॒भ्रु॒म् । आ॒ग्ने॒य॒म् ।
कृ॒ष्ण॒ग्री॒व॒मि॒ति॑ कृ॒ष्ण – ग्री॒व॒म् । पु॒रो॒धा॒या॒मि॒ति॑ पु॒रः – धा॒या॒म् ।
स्पर्ध॑मानः । आ॒ग्ने॒यः । वै । ब्रा॒ह्म॒णः । सौ॒म्यः । रा॒ज॒न्यः ।
अ॒भि॒तः । सौ॒म्य॒म् । आ॒ग्ने॒यौ । भ॒व॒तः । ते॒ज॒सा । ए॒व । ब्र॒ह्म॒णा ।
उ॒भ॒य॒तः । रा॒ष्ट्र॒म् । प॒री॒ति॑ । गृ॒ह्णा॒ति॑ । ए॒क॒धे॒त्ये॒क – धा॑ ।
स॒मा॒वृ॒द्ध॒ इति॑ सं – आ॒वृ॒द्धे॑ । पु॒रः । ए॒न॒म् । द॒ध॒ते॑ । 15 (43)
(ल॒भे॒त व॒रु॒णं – वँ॒शौ – ता॒म॒विं वँ॒शा॒मा॒दि॒त्ये॒भ्यः॑ का॒मा॒य – म॒ल्हा
आ ल॒भे॒त – ता॒न्ये॒व – सै॒वा॒स्मि॒न् – सो॒मः – स्व॑तो भ॒व॒ति –
त्रि॒च॒त्वा॒रि॒ंश॒च्च) (A2)

2.1.3.1

दे॒वा॒सु॒रा ए॒षु लो॒केष्व॑स्पर्ध॒न्त स ए॒तं वि॒ष्णु॑-र्वा॒मन॑मपश्यत्
त॒ स्वायै॑ दे॒वता॑या आऽल॒भत॑ ततो॒ वै स इ॒मां लो॒कान॑भ्यजयद्-
वैष्ण॑वं वा॒मन॑मा ल॒भेत॑ स्पर्ध॒मानो॑ वि॒ष्णु॒रेव॑ भू॒त्वेमा॑न् लो॒कान॑भि
जय॑ति वि॒षम॑ आ ल॒भेत॑ वि॒षमा॑ इ॒व ही॒मे लो॒काः स॒मृद्ध्य॑ इन्द्रा॒य
मन्यु॑मते॒ मन॑स्वते॒ ल॒लामं॑ प्राशृङ्ग॒मा ल॒भेत॑ संग्रा॒मे - [] 16

2.1.3.1 (Padam)

दे॒वा॒सु॒रा इति॑ दे॒व - अ॒सु॒राः । ए॒षु । लो॒केषु॑ । अ॒स्पर्ध॒न्त । सः ।
ए॒तम् । वि॒ष्णुः॑ । वा॒मन॑म् । अ॒पश्य॑त् । तम् । स्वायै॑ । दे॒वता॑यै ।
ए॒ति । अ॒ल॒भत॑ । ततः॑ । वै । सः । इ॒मान् । लो॒कान् । अ॒भीति॑ ।
अ॒जय॑त् । वैष्ण॑वम् । वा॒मन॑म् । ए॒ति । ल॒भेत॑ । स्पर्ध॒मानः॑ ।
वि॒ष्णुः॑ । ए॒व । भू॒त्वा । इ॒मान् । लो॒कान् । अ॒भीति॑ । जय॑ति ।
वि॒षम॑ इति॑ वि - स॒मे । ए॒ति । ल॒भेत॑ । वि॒षमा॑ इति॑ वि - स॒माः ।
इ॒व । हि॒ । इ॒मे । लो॒काः । स॒मृद्ध्य॑ इति॑ सं - ऋ॒द्ध्यै॑ । इन्द्रा॒य ।

म॒न्यु॒म॒त॒ इति॑ म॒न्यु॒ – म॒ते॑ । म॒न॒स्व॒ते॑ । ल॒ला॒म॒म् । प्रा॒शृ॒ङ्ग॒म् । ए॒ति॑ ।

ल॒भे॒त॒ । स॒ङ्ग्रा॒म॒ इति॑ सं – ग्रा॒मे॑ । 16 (50)

2.1.3.2

सँ॒य॒त्त॒ इन्द्रि॑येण॒ वै म॒न्यु॒ना॒ म॒न॒सा॒ सं॒ग्रा॒मं॒ ज॒य॒तीन्द्र॑मे॒व म॒न्यु॒म॒न्तं॒
म॒न॒स्व॒न्त॑ꣳ स्वे॒न भा॒ग॒धे॒ये॒नो॒प॒ धा॒व॒ति॒ स ए॒वास्मि॑न्निन्द्रि॒यं म॒न्युं॒ मनो॑
द॒धा॒ति॒ ज॒य॒ति॒ तꣳ सं॒ग्रा॒म॒मिन्द्रा॑य म॒रु॒त्व॒ते॑ पृ॒श्नि॒स॒क्थ॒मा ल॒भे॒त॒
ग्रा॒म॒का॒म॒ इन्द्र॑मे॒व म॒रु॒त्व॒न्त॑ꣳ स्वे॒न भा॒ग॒धे॒ये॒नो॒प॒ धा॒व॒ति॒ स ए॒वास्मै॑
स जा॒तान् प्र॑यच्छति॒ ग्रा॒म्ये॒व भ॒व॒ति॒ यदृ॑षभ॒स्तेनै॑ – [] 17

2.1.3.2 (Padam)

सँ॒य॒त्त॒ इति॑ सं – य॒त्ते॑ । इन्द्रि॑येण॒ वै । म॒न्यु॒ना॒ म॒न॒सा॒ ।

स॒ङ्ग्रा॒म॒मि॒ति॒ सं – ग्रा॒म॒म् । ज॒य॒ति॒ । इन्द्र॑म् । ए॒व ।

म॒न्यु॒म॒न्त॒मि॒ति॒ म॒न्यु॒ – म॒न्त॒म् । म॒न॒स्व॒न्त॒म् । स्वे॒न ।

भा॒ग॒धे॒ये॒ने॒ति॒ भा॒ग॒ – धे॒ये॒न॒ । उ॒पे॒ति॒ । धा॒व॒ति॒ । सः॑ । ए॒व ।

अ॒स्मि॒न् । इन्द्रि॑य॒म् । म॒न्यु॒म् । म॒नः॑ । द॒धा॒ति॒ । ज॒य॒ति॒ । त॒म् ।

स॒ङ्ग्रा॒म॒मि॒ति॒ सं – ग्रा॒म॒म् । इन्द्रा॑य । म॒रु॒त्व॒ते॑ ।

पृ॒श्नि॒स॒क्थ॒मि॒ति॒ पृ॒श्नि॒ – स॒क्थ॒म् । ए॒ति॒ । ल॒भे॒त॒ ।
ग्रा॒म॒का॒म॒ इ॒ति॒ ग्रा॒म॒ – का॒मः॑ । इ॒न्द्र॒म् । ए॒व । म॒रु॒त्व॒न्त॒म् ।
स्वे॒न॒ । भा॒ग॒धे॒ये॒ने॒ति॒ भा॒ग॒ – धे॒ये॒न॒ । उ॒पे॒ति॒ । धा॒व॒ति॒ । सः॑ ।
ए॒व । अ॒स्मै॒ । स॒जा॒ता॒नि॒ति॒ स॒ – जा॒ता॒न् । प्रे॒ति॒ । य॒च्छ॒ति॒ । ग्रा॒मी॒ ।
ए॒व । भ॒व॒ति॒ । यत् । ऋ॒ष॒भः॑ । ते॒न॒ । 17 (50)

2.1.3.3

–न्द्रो॑ यत् पृ॒श्नि॒स्ते॒न॒ मा॒रु॒तः॑ स॒मृ॒द्ध्यै॑ प॒श्चात् पृ॒श्नि॒स॒क्थो॑ भ॒व॒ति॒
प॒श्चा॒द॒न्व॒–व॒सा॒यि॒नी॒मे॒वा॒स्मै॒ वि॒शं॑ क॒रो॒ति॒ सौ॒म्यं॑ ब॒भ्रु॒मा
ल॒भे॒ता॒न्न॒का॒मः॑ सौ॒म्यं॑ वा॒ अ॒न्नं॑ सो॒म॒मे॒व॒ स्वे॒न॒ भा॒ग॒धे॒ये॒नो॒प॒ धा॒व॒ति॒
स॒ ए॒वा॒स्मा॒ अ॒न्नं॑ प्र॒य॒च्छ॒त्य॒न्ना॒द॒ ए॒व॒ भ॒व॒ति॒ ब॒भ्रु॒र्भ॒व॒त्ये॒त॒द्वा॒ अ॒न्न॒स्य॑
रू॒पं॑ स॒मृ॒द्ध्यै॑ सौ॒म्यं॑ ब॒भ्रु॒मा॒ ल॒भे॒त॒ य॒म॒लं॑ – [] 18

2.1.3.3 (Padam)

ऐ॒न्द्रः॑ । यत् । पृ॒श्निः॑ । ते॒न॒ । मा॒रु॒तः॑ । स॒मृ॒द्ध्यै॑ इ॒ति॒ सं॒–ऋ॒द्ध्यै॑ ।
प॒श्चात् । पृ॒श्नि॒स॒क्थ॒ इ॒ति॒ पृ॒श्नि॒ – स॒क्थः॑ । भ॒व॒ति॒ ।
प॒श्चा॒द॒न्व॒व॒सा॒यि॒नी॒मि॒ति॒ प॒श्चात् – अ॒न्व॒व॒सा॒यि॒नी॒म् । ए॒व । अ॒स्मै॒ ।

वि॒शम् । क॒रो॒ति॒ । सौ॒म्यम् । ब॒भ्रुम् । ए॒ति॒ । ल॒भे॒त॒ ।
 आ॒न्न॒का॒म॒ इ॒त्य॒न्न॒ – का॒मः॒ । सौ॒म्यम् । वै । अ॒न्नम् । सो॒मम् । ए॒व ।
 स्वे॒न॒ । भा॒ग॒धे॒ये॒ने॒ति॒ भा॒ग॒ – धे॒ये॒न॒ । उ॒पे॒ति॒ । धा॒व॒ति॒ । सः ।
 ए॒व । अ॒स्मै॒ । अ॒न्नम् । प्रे॒ति॒ । य॒च्छ॒ति॒ । अ॒न्ना॒द॒ इ॒त्य॒न्न॒ – अ॒दः ।
 ए॒व । भ॒व॒ति॒ । ब॒भ्रुः॒ । भ॒व॒ति॒ । ए॒तत् । वै । अ॒न्न॒स्य॒ । रू॒पम् ।
 स॒मृ॒द्ध्य॒ इ॒ति॒ सं – ऋ॒द्ध्यै॒ । सौ॒म्यम् । ब॒भ्रुम् । ए॒ति॒ । ल॒भे॒त॒ ।
 यम् । अ॒लम् । 18 (50)

2.1.3.4

रा॒ज्या॒य॒ स॒न्त॒ꣳ रा॒ज्यं॑ नो॒प॒न॒मे॒त् सौ॒म्यं॑ वै रा॒ज्य॒ꣳ सो॒म॒मे॒व॒ स्वे॒न॒
 भा॒ग॒धे॒ये॒नो॒प॒ धा॒व॒ति॒ स॒ ए॒वा॒स्मै॒ रा॒ज्यं॑ प्र॒य॒च्छ॒त्यु॒पै॒न॒ꣳ रा॒ज्यं॑ न॒म॒ति॒
 ब॒भ्रु॒र्भ॒व॒त्ये॒तद् वै॒ सो॒म॒स्य॒ रू॒प॒ꣳ स॒मृ॒द्ध्य॒ इ॒न्द्रा॒य॒ वृ॒त्र॒तु॒रे॒ ल॒ला॒मं॑
 प्रा॒शृ॒ङ्ग॒मा॒ ल॒भे॒त॒ ग॒त॒श्रीः॑ प्र॒ति॒ष्ठा॒का॒मः॑ पा॒प्मान॑मे॒व वृ॒त्रं॑ ती॒र्त्वा॑ प्र॒ति॒ष्ठां॑
 ग॒च्छ॒ती॒न्द्रा॒या॒भि॒मा॒ति॒घ्ने॑ ल॒ला॒मं॑ प्रा॒शृ॒ङ्ग॒मा॒ – [] 19

2.1.3.4 (Padam)

रा॒ज्याय॑ । स॒न्तम् । रा॒ज्यम् । न । उ॒प॒न॒मे॒दि॒त्यु॒प॒-न॒मे॒त् । सौ॒म्यम् ।
वै । रा॒ज्यम् । सो॒मम् । ए॒व । स्वे॒न । भा॒ग॒धे॒ये॒ने॒ति॑ भा॒ग - धे॒ये॒न ।
उ॒पे॒ति॑ । धा॒व॒ति॑ । सः । ए॒व । अ॒स्मै । रा॒ज्यम् । प्रे॒ति॑ । य॒च्छ॒ति॑ ।
उ॒पे॒ति॑ । ए॒नम् । रा॒ज्यम् । न॒म॒ति॑ । ब॒भ्रुः । भ॒व॒ति॑ । ए॒तत् । वै ।
सौ॒म॒स्य॑ । रू॒पम् । स॒मृ॒द्॒ध्या॒ इति॑ सं - ऋ॒द्॒ध्यै । इ॒न्द्राय॑ ।
वृ॒त्र॒तु॒र॒ इति॑ वृ॒त्र - तु॒रे॑ । ल॒ला॒मम् । प्रा॒शृ॒ङ्गम् । ए॒ति॑ । ल॒भे॒त॑ ।
ग॒त॒श्री॒रि॒ति॑ ग॒त - श्रीः॑ । प्र॒ति॒ष्ठा॒काम॑ इति॑ प्र॒ति॒ष्ठा - का॒मः ।
पा॒प्मान॑म् । ए॒व । वृ॒त्रम् । ती॒र्त्वा । प्र॒ति॒ष्ठा॒मि॒ति॑ प्र॒ति - स्था॑म् ।
ग॒च्छ॒ति॑ । इ॒न्द्राय॑ । अ॒भि॒मा॒ति॒घ्न॑ इत्य॒भि॒मा॒ति॑ - घ्ने॑ । ल॒ला॒मम् ।
प्रा॒शृ॒ङ्गम् । ए॒ति॑ । 19 (50)

2.1.3.5

ल॒भे॒त॑ यः पा॒प्म॒ना॑ गृही॒तः॑ स्या॒त् पा॒प्मा॑ वा अ॒भि॒मा॒ति॒रि॒न्द्र॒मे॒वा-
भि॒मा॒ति॒ह॒न॑ स्वे॒न भा॒ग॒धे॒ये॒नो॒प॑ धा॒व॒ति॑ स ए॒वा॒स्मा॒त्
पा॒प्मान॑म॒भि॒मा॒तिं॑ प्र॒णु॒द॒त॑ इ॒न्द्राय॑ व॒ज्रि॒णे॑ ल॒ला॒मं॑ प्रा॒शृ॒ङ्ग॒मा॑ ल॒भे॒त॑

यमल॑ꣳ राज्याय॑ सन्त॑ꣳ राज्यं॑ नोपनमेदिन्द्र॑मेव॑ वज्रिण॑ꣳ स्वेन॑
 भाग॑धेयेनोप॑ धावति॑ स एवा॑स्मै वज्रं॑ प्र यच्छति॑ स ए॒नं () वज्रो॑
 भूत्या॑ इन्ध॑ उपै॒नꣳ राज्यं॑ नमति॑ ललामः॑ प्राशृङ्गो॑ भवत्येत॑द्वै वज्रस्य॑
 रूप॑ꣳ समृद्ध्यै॑ । 20

2.1.3.5 (Padam)

ल॒भेत॑ । यः । पा॒प्मना॑ । गृ॒हीतः॑ । स्यात् । पा॒प्मा । वै ।
 अ॒भिमा॑तिरित्यभि॑ – मा॒तिः । इन्द्र॑म् । ए॒व ।
 अ॒भिमा॑तिह॒नमि॑त्यभिमा॑ति – ह॒नम् । स्वे॒न । भा॒गधे॑येनेति॑
 भा॒ग – धे॑येन । उ॒पेति॑ । धा॒वति॑ । सः । ए॒व । अ॒स्मात् । पा॒प्मान॑म् ।
 अ॒भिमा॑तिमि॒त्यभि॑ – मा॒तिम् । प्रेति॑ । नु॒दते॑ । इन्द्रा॑य । वज्रि॑णे ।
 ल॒लाम॑म् । प्रा॒शृङ्ग॑म् । ए॒ति । ल॒भेत॑ । यम् । अ॒लम् । रा॒ज्याय॑ ।
 स॒न्तम् । रा॒ज्यम् । न । उ॒पन॑मे॒दित्यु॑प – नमे॑त् । इन्द्र॑म् । ए॒व ।
 वज्रि॑णम् । स्वे॒न । भा॒गधे॑येनेति॑ भा॒ग – धे॑येन । उ॒पेति॑ । धा॒वति॑ ।
 सः । ए॒व । अ॒स्मै । वज्र॑म् । प्रेति॑ । य॒च्छति॑ । सः । ए॒नम् () ।

वज्रः । भूत्यै । इन्धे । उपेति । एनम् । राज्यम् । नमति । ललामः ।
प्राशृङ्गः । भवति । एतत् । वै । वज्रस्य । रूपम् ।
समृद्ध्या इति सं – ऋद्ध्यै । 20 (65)

(संग्रामे – तेना – ल – मभिमातिघ्ने ललामं प्राशृङ्गमै – नं –
पञ्चदश च) (A3)

2.1.4.1

असावादित्यो न व्यरोचत तस्मै देवाः प्रायश्चित्तिमच्छन् तस्मा एतां
दशर्षभामाऽलभन्त तयैवास्मिन् रुचमदधुर्यो ब्रह्मवर्चसकामः स्यात्
तस्मा एतां दशर्षभामा लभेता-मुमेवाऽऽदित्यं स्वेन भागधेयेनोप
धावति स एवास्मिन् ब्रह्मवर्चसं दधाति ब्रह्मवर्चस्यैव भवति वसन्ता
प्रातस्त्रीन् ललामाना लभेत ग्रीष्मे मध्यन्दिने – [] 21

2.1.4.1 (Padam)

असौ । आदित्यः । न । वीति । अरोचत । तस्मै । देवाः ।
प्रायश्चित्तिम् । ऐच्छन् । तस्मै । एताम् । दशर्षभामिति
दश – ऋषभाम् । एति । अलभन्त । तया । एव । अस्मिन् ।

रुचम् । अ॒दधुः । यः । ब्र॒ह्मव॑र्चस॒काम॑ इति ब्र॒ह्मव॑र्चस – का॒मः ।
स्यात् । तस्मै॑ । ए॒ताम् । द॒शर्ष॑भा॒मिति॑ द॒श – ऋ॒षभा॑म् । ए॒ति ।
ल॒भेत॑ । अ॒मुम् । ए॒व । आ॒दि॒त्यम् । स्व॑ेन । भा॒गधे॑येनेति
भा॒ग – धे॑येन । उ॒पेति॑ । धा॒वति॑ । सः । ए॒व । अ॒स्मिन् ।
ब्र॒ह्मव॑र्चस॒मिति॑ ब्र॒ह्म – वर्च॑सम् । द॒धाति॑ ।
ब्र॒ह्मव॑र्चसीति ब्र॒ह्म – वर्च॑सी । ए॒व । भ॒वति॑ । व॒सन्ता॑ । प्रा॒तः ।
त्रीन् । ल॒लामा॑न् । ए॒ति । ल॒भेत॑ । ग्री॒ष्मे । म॒ध्यन्दि॑ने । 21 (50)

2.1.4.2

त्री॒ज्छिति॑ पृ॒ष्ठाञ्छर॑द्यपरा॒ह्णे त्री॒ज्छिति॑वा॒रान् त्री॒णि वा आ॑दि॒त्यस्य॑
तेजा॑सि व॒सन्ता॑ प्रा॒तर्ग्री॑ष्मे म॒ध्यन्दि॑ने शर॑द्यपरा॒ह्णे याव॑न्त्ये॒व
तेजा॑सि ता॒न्येवा॑व रु॒न्धे त्रय॑स्त्रय॒ आ ल॑भ्यन्ते-ऽभि पू॒र्वमे॒वास्मिन्
तेजो॑ द॒धाति॑ सँव॒त्सरं॑ पर्या॒लभ्य॑न्ते सँव॒त्सरो॑ वै ब्र॒ह्मव॑र्चस॒स्य
प्र॒दाता॑ सँव॒त्सर॑ ए॒वास्मै॑ ब्र॒ह्मव॑र्चसं प्र य॒च्छति॑ ब्र॒ह्मव॑र्चस्ये॒व भ॑वति
सँव॒त्सर॑स्य॒ पर॑स्तात् प्रा॒जाप॑त्यं क॒द्रु – [] 22

2.1.4.2 (Padam)

त्रीन् । शि॒ति॒पृ॒ष्ठानि॑ति शि॒ति – पृ॒ष्ठान् । श॒रदि॑ । अ॒परा॒ह्ण
इत्य॑पर-अ॒हे । त्रीन् । शि॒ति॒वा॒रा॒नि॑ति शि॒ति – वा॒रान् । त्री॑णि । वै ।
आ॒दि॒त्यस्य॑ । ते॒जा॒सि॑ । व॒सन्ता॑ । प्रा॒तः । ग्री॒ष्मे । म॒ध्यन्दि॑ने ।
श॒रदि॑ । अ॒परा॒ह्ण इत्य॑पर-अ॒हे । या॒वन्ति॑ । ए॒व । ते॒जा॒सि॑ । ता॒नि ।
ए॒व । अ॒वेति॑ । रु॒न्धे । त्रय॑स्त्रय॒ इति॑ त्रयः-त्रयः । ए॒ति । ल॒भ्यन्ते॑ ।
अ॒भिपूर्व॑मित्य॒भि – पूर्व॑म् । ए॒व । अ॒स्मिन् । ते॒जः । द॒धाति॑ ।
सँव॑त्सरमि॒ति सं – व॒त्सर॑म् । पर्या॑ल॒भ्यन्त॑ इति॒ परि॑-आल॒भ्यन्ते॑ ।
सँव॑त्सर इति॒ सं – व॒त्सरः॑ । वै । ब्र॒ह्मव॑र्चसस्येति॑
ब्र॒ह्म – व॒र्चस॑स्य । प्र॒दा॒तेति॑ प्र – दा॒ता । सँव॑त्सर इति॒
सं – व॒त्सरः॑ । ए॒व । अ॒स्मै । ब्र॒ह्मव॑र्चसमि॒ति ब्र॒ह्म – व॒र्चस॑म् ।
प्रेति॑ । य॒च्छति॑ । ब्र॒ह्मव॑र्चसीति॒ ब्र॒ह्म – व॒र्चसी॑ । ए॒व । भ॒वति॑ ।
सँव॑त्सरस्येति॒ सं – व॒त्सर॑स्य । पर॑स्तात् ।
प्रा॒जाप॑त्यमि॒ति प्रा॒जा – प॒त्यम् । क॒द्रुम् । 22 (50)

2.1.4.3

–मा ल॒भेत॑ प्र॒जाप॑तिः सर्वा॑ दे॒वता॑ दे॒वता॑स्वे॒व प्र॑ति॒तिष्ठ॑ति यदि॑
 बि॒भीयाद्–दु॒श्च॒र्मा भ॑वि॒ष्यामी॑ति सो॒मापौ॑ष्ण॒ऽश्याम॑मा ल॒भेत॑ सौ॒म्यो
 वै दे॒वत॑या पु॒रुषः॑ पौ॒ष्णाः प॒शवः॑ स्वयै॒वास्मै॑ दे॒वत॑या प॒शुभि॑स्त्वचं॑
 करो॑ति न दु॒श्च॒र्मा भ॑वति दे॒वाश्च॑ वै य॒मश्चा॑स्मिन् लो॒केऽस्पर्ध॑न्त॒ स
 य॒मो दे॒वाना॑मिन्द्रि॒यं वी॒र्य॑मयुवत॒ तद्य॑मस्य – [] 23

2.1.4.3 (Padam)

ए॒ति । ल॒भेत॑ । प्र॒जाप॑तिरि॒ति प्र॒जा – प॑तिः । सर्वाः॑ । दे॒वताः॑ ।
 दे॒वता॑सु । ए॒व । प्र॒तीति॑ । तिष्ठ॑ति । यदि॑ । बि॒भीयात् । दु॒श्च॒र्मेति॑
 दुः–च॒र्मा । भ॑वि॒ष्यामि॑ । इति॑ । सो॒मापौ॑ष्णमि॒ति सो॒मा – पौ॑ष्णम् ।
 श्याम॑म् । ए॒ति । ल॒भेत॑ । सौ॒म्यः । वै । दे॒वत॑या । पु॒रुषः॑ । पौ॒ष्णाः ।
 प॒शवः॑ । स्वया॑ । ए॒व । अ॒स्मै । दे॒वत॑या । प॒शुभि॑रि॒ति प॒शु – भिः॑ ।
 त्वच॑म् । करो॑ति । न । दु॒श्च॒र्मेति॑ दुः – च॒र्मा । भ॑वति॒ । दे॒वाः ।
 च । वै । य॒मः । च । अ॒स्मिन् । लो॒के । अ॒स्पर्ध॑न्त॒ सः । य॒मः ।
 दे॒वाना॑म् । इन्द्रि॒यम् । वी॒र्य॑म् । अ॒युव॑त । तत् । य॒मस्य॑ । 23 (50)

2.1.4.4

यम॒त्वं ते॒ दे॒वा अ॒मन्य॑न्त॒ यमो॑ वा इ॒दम॑भू॒द्-यद्-वय॑ꣳ स्म इति॒
 ते प्र॒जाप॑तिमु॒पाधा॑वन्थ् स ए॒तौ प्र॒जाप॑तिरा॒त्मन॑ उ॒क्षव॑शौ नि॒रमि॑मीत॒
 ते दे॒वा वै॒ष्णाव॑रुणींँ व॒शामा॑-ऽल॒भन्तै॑न्द्रमु॒क्षाण॑तं व॒रुणे॑नैव
 ग्राह॑यित्वा वि॒ष्णुना॑ य॒ज्ञेन॑ प्रा॒णुद॑न्तै॒न्द्रेणै॑-वा॒स्येन्द्रि॑यम॒-वृञ्ज॑त यो
 भ्रातृ॑व्यवा॒न्थ् स्या॑त् स स्पर्ध॑मानो वैष्णाव॑रुणीं - [] 24

2.1.4.4 (Padam)

यम॒त्वमि॑ति॒ यम॑ - त्वम् । ते । दे॒वाः । अ॒मन्य॑न्त । यमः॑ । वै ।
 इ॒दम् । अ॒भूत् । यत् । वयम् । स्मः । इति॑ । ते ।
 प्र॒जाप॑तिमि॒ति प्र॒जा - प॒तिम् । उ॒पेति॑ । अ॒धाव॑न् । सः । ए॒तौ ।
 प्र॒जाप॑तिरि॒ति प्र॒जा - प॒तिः । आ॒त्मनः॑ । उ॒क्षव॑शा॒वित्यु॑क्ष - व॒शौ ।
 नि॒रिति॑ । अ॒मिमी॑त । ते । दे॒वाः । वै॒ष्णाव॑रुणीमि॒ति वैष्णा॑-व॒रुणी॑म् ।
 व॒शाम् । एति॑ । अ॒लभ॑न्त । ऐ॒न्द्रम् । उ॒क्षाण॑म् । तम् । व॒रुणे॑न ।
 ए॒व । ग्राह॑यित्वा । वि॒ष्णुना॑ । य॒ज्ञेन॑ । प्रेति॑ । अ॒नुद॑न्त । ऐ॒न्द्रेण॑ ।
 ए॒व । अ॒स्य । इ॒न्द्रि॑यम् । अ॒वृञ्ज॑त । यः ।

भ्रातृ॑व्य॒वानि॒ति॒ भ्रातृ॑व्य – वा॒न् । स्यात् । सः । स्पर्ध॑मानः ।

वैष्णा॑वरु॒णीमि॒ति॒ वैष्णा॑ – वरु॒णीम् । 24 (50)

2.1.4.5

व॑शामा ल॒भेतै॑न्द्रमु॒क्षाणं॑ व॒रुणे॑नैव भ्रातृ॑व्यं ग्राहयित्वा विष्णु॑ना
यज्ञे॑न प्रणुदत ऐ॒न्द्रेणै॑वास्ये॒न्द्रियं॑ वृ॒द्धे भव॑त्यात्मना परा॒स्य
भ्रातृ॑व्यो भवतीन्द्रो वृ॒त्रम॑हन् तं वृ॒त्रो ह॑तः षोड॑शभिः-भोगै॑रसिनात्
तस्य॑ वृ॒त्रस्य॑ शी॒र्षतो॑ गाव उदा॑यन् ता वैदे॒ह्योऽभव॑न् तासामृष॑भो
जघ॑नेऽनू॒दैत् तमिन्द्रो॑ – [] 25

2.1.4.5 (Padam)

व॑शाम् । एति॑ । ल॒भेत॑ । ऐ॒न्द्रम् । उ॒क्षाण॑म् । व॒रुणे॑न । ए॒व ।
भ्रातृ॑व्यम् । ग्राहयित्वा । विष्णु॑ना । यज्ञे॑न । प्रेति॑ । नुद॑ते ।
ऐ॒न्द्रेण॑ । ए॒व । अ॒स्य । इ॒न्द्रिय॑म् । वृ॒द्धे । भव॑ति । आ॒त्मना॑ ।
परेति॑ । अ॒स्य । भ्रातृ॑व्यः । भव॑ति । इन्द्रः॑ । वृ॒त्रम् । अ॒हन् । तम् ।
वृ॒त्रः । ह॑तः । षोड॑शभिरिति षोड॑श – भिः । भोगैः॑ । अ॒सिनात् ।
तस्य॑ । वृ॒त्रस्य॑ । शी॒र्षतः॑ । गावः॑ । उदि॑ति । आ॒यन् । ताः ।

वै॒दे॒ह्यः । अ॒भ॒वन् । ता॒साम् । ऋ॒ष॒भः । ज॒घ॒ने । अनु । उ॒दि॒ति ।

ऐ॒त् । तम् । इ॒न्द्रः । 25 (50)

2.1.4.6

ऽचा॒य॒त् सोऽम॒न्य॒त यो वा इ॒म॒मा॒ल॒भे॒त मु॒च्ये॒ता॒स्मात् पा॒प्म॒न इति॒ स
आ॒ग्ने॒यं कृ॒ष्ण॒ग्री॒व॒मा ल॒भ॒तै॒न्द्र॒मृ॒ष॒भं तस्या॒ग्नि॒रे॒व स्वे॒न
भा॒ग॒धे॒ये॒नो॒प सृ॒तः षोड॑श॒धा वृ॒त्र॒स्य भो॒गा॒न॒प्य॒द॒ह॒दै॒न्द्रे॒णो॒न्द्रि॒य-
मा॒त्म॒न्न॒ध॒त्त यः पा॒प्म॒ना गृ॒ही॒तः स्या॒त् स आ॒ग्ने॒यं कृ॒ष्ण॒ग्री॒व॒मा
ल॒भे॒तै॒न्द्र॒मृ॒ष॒भ-म॒ग्नि॒रे॒वा॒स्य स्वे॒न भा॒ग॒धे॒ये॒नो॒प॒सृ॒तः - [] 26

2.1.4.6 (Padam)

अ॒चा॒य॒त् । सः । अ॒म॒न्य॒त । यः । वै । इ॒म॒म् ।

आ॒ल॒भे॒ते॒त्या - ल॒भे॒त । मु॒च्ये॒त । अ॒स्मात् । पा॒प्म॒नः । इति॒ । सः ।

आ॒ग्ने॒यम् । कृ॒ष्ण॒ग्री॒व॒मि॒ति कृ॒ष्ण - ग्री॒वम् । ए॒ति । अ॒ल॒भ॒त ।

ऐ॒न्द्र॒म् । ऋ॒ष॒भम् । त॒स्य । अ॒ग्निः । ए॒व । स्वे॒न । भा॒ग॒धे॒ये॒ने॒ति

भा॒ग - धे॒ये॒न । उ॒प॒सृ॒त इ॒त्यु॒प - सृ॒तः । षोड॑श॒धे॒ति षोड॑श-धा ।

वृ॒त्र॒स्य । भो॒गा॒न् । अ॒पी॒ति । अ॒द॒ह॒त् । ऐ॒न्द्रे॒ण । इ॒न्द्रि॒यम् ।

आ॒त्मन् । अ॒धत्त॑ । यः । पा॒प्मना॑ । गृ॒हीतः॑ । स्यात् । सः ।
 आ॒ग्ने॒यम् । कृ॒ष्णा॒ग्नी॒वमि॑ति कृ॒ष्ण – ग्री॒वम् । ए॒ति । ल॒भेत॑ ।
 ऐ॒न्द्रम् । ऋ॒षभ॑म् । अ॒ग्निः । ए॒व । अ॒स्य । स्वे॒न ।
 भा॒गधे॒येने॑ति भा॒ग – धे॒येन॑ । उ॒प॒सृत॑ इत्यु॒प – सू॒तः । 26 (50)

2.1.4.7

पा॒प्मान॑मपि द॒हत्यै॒न्द्रेण॑ इन्द्रि॒यमा॑त्मन् ध॒त्ते मु॑च्यते पा॒प्मनो॑
 भव॑त्ये॒व द्या॒वापृ॑थि॒व्यां धे॒नुमा॑ ल॒भेत॑ ज्यो॒गप॑रुद्धो ऽनयो॑र्हि वा
 ए॒षोऽप्र॑तिष्ठि॒तोऽथै॑ष ज्यो॒गप॑रुद्धो द्या॒वापृ॑थि॒वी ए॒व स्वे॒न भा॒गधे॒येनो॑प
 धा॒वति॑ ते ए॒वैनं॑ प्र॒तिष्ठां॑ ग॒मय॑तः प्र॒त्ये॒व ति॑ष्ठति पर्या॒रिणी॑ भवति
 पर्या॒री॒व ह्ये॒तस्य॑ रा॒ष्ट्रं यो॑ ज्यो॒गप॑रुद्धः स॒मृद्ध॑यै वा॒यव्यं॑ – [] 27

2.1.4.7 (Padam)

पा॒प्मान॑म् । अ॒पीति॑ । द॒हति॑ । ऐ॒न्द्रेण॑ । इन्द्रि॒यम् । आ॒त्मन् । ध॒त्ते ।
 मु॑च्यते । पा॒प्मनः॑ । भव॑ति । ए॒व । द्या॒वापृ॑थि॒व्यामि॑ति
 द्या॒वा – पृ॑थि॒व्याम् । धे॒नुम् । ए॒ति । ल॒भेत॑ । ज्यो॒गप॑रुद्ध इति
 ज्यो॒क् – अ॒प॒रुद्धः॑ । अ॒नयोः॑ । हि । वै । ए॒षः ।

अप्रतिष्ठित॑ इत्यप्रति॑ – स्थितः॑ । अथ॑ । एषः॑ । ज्योक्॑ ।
 अपरुद्ध॑ इत्यप॑ – रुद्धः॑ । द्यावापृथिवी॑ इति॑ द्यावा॑ – पृथिवी॑ ।
 एव॑ । स्वेन॑ । भागधेयेनेति॑ भाग॑ – धेयेन॑ । उपेति॑ । धावति॑ ।
 ते इति॑ । एव॑ । एनम्॑ । प्रतिष्ठामिति॑ प्रति॑ – स्थाम्॑ । गमयतः॑ ।
 प्रतीति॑ । एव॑ । तिष्ठति॑ । पर्यारिणी॑ । भवति॑ । पर्यारि॑ । इव॑ ।
 हि॑ । एतस्य॑ । राष्ट्रम्॑ । यः॑ । ज्योगपरुद्ध॑ इति॑ ज्योक्॑ – अपरुद्धः॑ ।
 समृद्ध्या॑ इति॑ सं – ऋद्ध्यै॑ । वायव्यम्॑ । 27 (50)

2.1.4.8

वथ्समा॑ लभेत॑ वायुर्वा॑ अनयोर्वथ्स॑ इमे॑ वा एतस्मै॑ लोका॑ अपशुष्का॑
 विडपशुष्काऽथैष॑ ज्योगपरुद्धो॑ वायुमेव॑ स्वेन॑ भागधेयेनोप॑ धावति॑
 स एवास्मा॑ इमां॑ लोकान्॑ विशं॑ प्रदापयति॑ प्रास्मा॑ इमे॑ लोकाः॑
 स्नुवन्तिभुञ्जत्येनं॑ विडुपतिष्ठते॑ । 28

2.1.4.8 (Padam)

वथ्सम्॑ । एति॑ । लभेत॑ । वायुः॑ । वै॑ । अनयोः॑ । वथ्सः॑ । इमे॑ । वै॑ ।
 एतस्मै॑ । लोकाः॑ । अपशुष्का॑ इत्यप॑ – शुष्काः॑ । विट्॑ ।

अप॑शु॒ष्केत्य॑प – शु॒ष्का॒ । अथ॑ । ए॒षः । ज्यो॑क् ।

अप॑रु॒द्ध इत्य॑प – रु॒द्धः । वा॒युम् । ए॒व । स्वे॑न ।

भा॒गधे॑येनेति॑ भा॒ग – धे॑येन । उ॒पेति॑ । धा॒वति॑ । सः । ए॒व ।

अ॒स्मै । इ॒मान् । लो॒कान् । वि॒शम् । प्रेति॑ । दा॒पय॑ति । प्रेति॑ ।

अ॒स्मै । इ॒मे । लो॒काः । स्नु॒वन्ति॑ । भु॒ञ्जती॑ । ए॒नम् । विट् ।

उ॒पेति॑ । तिष्ठ॑ते । 28 (42)

(म॒ध्यन्दि॑ने – क॒द्रु॑ – य॒मस्य॑ – स्पर्ध॑मानो वैष्णा॒वरु॑णीं –

तमि॑न्द्रो – ऽस्य॑ स्वे॑न भा॒गधे॑येनो॒पसृ॑तो – वा॒यव्यं॑ –

द्वि॑चत्वारि॒ंशच्च॑) (A4)

2.1.5.1

इ॒न्द्रो व॒लस्य॑ बि॒लम॑पौ॒र्णोथ् स॑ य उ॒त्तमः॑ प॒शुरा॑सीत् तं पृ॒ष्ठं प्र॑ति

सं॒गृह्यो॑दक्खि॒दत् त॑ सह॒स्रं प॑शवो॒ऽनूदा॑यन्थ् स उ॒न्नतो॑ऽभव॒द्यः

प॒शुका॑मः स्या॒थ् स ए॒तमै॑न्द्रमु॒न्नत॑मा ल॒भेते॑न्द्रमे॒व स्वे॑न भा॒गधे॑येनो॒प

धा॒वति॑ स ए॒वास्मै॑ प॒शून् प्र॑यच्छति प॒शुमा॑ने॒व भ॑वत्यु॒न्नतो॑ –[] 29

2.1.5.1 (Padam)

इन्द्रः । वलस्य । बिलम् । अपेति । और्णोत् । सः । यः ।
उत्तम इत्युत् – तमः । पशुः । आसीत् । तम् । पृष्ठम् ।
प्रतीति । संगृह्येति सं – गृह्य । उदिति । अक्खिदत् । तम् ।
सहस्रम् । पशवः । अनु । उदिति । आयन् । सः ।
उन्नत इत्युत् – नतः । अभवत् । यः । पशुकाम इति पशु-कामः ।
स्यात् । सः । एतम् । ऐन्द्रम् । उन्नतमित्युत्-नतम् । एति । लभेत ।
इन्द्रम् । एव । स्वेन । भागधेयेनेति भाग – धेयेन । उपेति ।
धावति । सः । एव । अस्मै । पशून् । प्रेति । यच्छति ।
पशुमानिति पशु – मान् । एव । भवति ।
उन्नत इत्युत् – नतः । 29 (49)

2.1.5.2

भवति साहस्री वा एषा लक्ष्मी यदुन्नतो लक्ष्मियै व पशूनव रुन्धे
यदा सहस्रं पशून् प्राप्नुयादथ वैष्णवं वामनमा लभेतैतस्मिन्
वै तथ् सहस्रमध्यतिष्ठत् तस्मादेष वामनः समीषितः पशुभ्य एव

प्र॒जा॒ते॒भ्यः॑ प्र॒ति॒ष्ठां॑ द॒धा॒ति॒ कौ॒ऽर्॒ह॒ति॒ स॒ह॒स्रं॑ प॒शून् प्राप्नु॒मित्याहु॑-
रहो॒रा॒त्रा॒ण्ये॒व स॒ह॒स्रं॑ स॒म्पा॒द्याऽऽ*ल॒भे॒त प॒शवो॑ – [] 30

2.1.5.2 (Padam)

भ॒व॒ति॒ । सा॒ह॒स्री॑ । वै । ए॒षा । ल॒क्ष्मी॑ । यत् । उ॒न्न॒त इ॒त्यु॒त् – न॒तः ।
ल॒क्ष्मि॒या॑ ॥ ए॒व । प॒शून् । अ॒वे॒ति॒ । रु॒न्धे॑ । य॒दा । स॒ह॒स्र॑म् । प॒शून् ।
प्राप्नु॒या॒दि॒ति॒ प्र – आ॒प्नु॒या॒त् । अ॒थ । वै॒ष्ण॒व॒म् । वा॒म॒न॒म् । ए॒ति॒ ।
ल॒भे॒त । ए॒त॒स्मि॒न् । वै । तत् । स॒ह॒स्र॑म् । अ॒धी॒ति॒ । अ॒ति॒ष्ठ॒त् ।
त॒स्मा॒त् ॥ ए॒षः । वा॒म॒नः॑ । स॒मी॒षि॒त इ॒ति॒ सं – ई॒षि॒तः॑ ।
प॒शु॒भ्य इ॒ति॒ प॒शु – भ्यः॑ । ए॒व । प्र॒जा॒ते॒भ्य इ॒ति॒ प्र – जा॒ते॒भ्यः॑ ।
प्र॒ति॒ष्ठा॒मि॒ति॒ प्र॒ति – स्था॑म् । द॒धा॒ति॒ । कः॑ । अ॒र्॒ह॒ति॒ ।
स॒ह॒स्र॑म् । प॒शून् । प्राप्नु॒मि॒ति॒ प्र – आ॒प्नु॒म् । इ॒ति॒ । आ॒हुः॑ ।
अ॒हो॒रा॒त्रा॒णी॒त्य॒हः – रा॒त्रा॒णि॑ । ए॒व । स॒ह॒स्र॑म् ।
स॒म्पा॒द्ये॒ति॒ सं – पा॒द्य॑ । ए॒ति॒ । ल॒भे॒त । प॒श॒वः॑ । 30 (50)

2.1.5.3

वा अ॒हो॒रा॒त्राणि॑ प॒शूने॑व प्र॒जा॒तान्॑ प्र॒तिष्ठां॑ ग॒मय॑-त्यो॒ष॒धी॒भ्यो वे॒हत॑मा
ल॒भेत॑ प्र॒जा॒काम॑ ओ॒ष॒धयो॑ वा ए॒तं प्र॒जायै॑ परि॒बाध॑न्ते योऽलं॑ प्र॒जायै॑
सन् प्र॒जां न वि॒न्दत॑ ओ॒ष॒धयः॑ खलु॒ वा ए॒तस्यै॑ सू॒तुम॑पि घ्नन्ति॒ या
वे॒हद्-भ॒वत्यो॒ष॒धीरे॑व स्वे॒न भा॒ग॒धेये॒नोप॑ धाव॒ति ता ए॒वास्मै॑
स्वाद्यो॒नेः॑ प्र॒जां प्र॑ जनयन्ति वि॒न्दते॑ - [] 31

2.1.5.3 (Padam)

वै । अ॒हो॒रा॒त्राणी॑त्यहः - रा॒त्राणि॑ । प॒शून् । ए॒व । प्र॒जा॒तानि॑ति
प्र - जा॒तान् । प्र॒तिष्ठा॑मिति॒ प्रति॑ - स्था॒म् । ग॒मय॑ति । ओ॒ष॒धी॒भ्य
इत्यो॒ष॒धि - भ्यः॑ । वे॒हत॑म् । ए॒ति । ल॒भेत॑ । प्र॒जा॒काम॑ इति॒
प्र॒जा - का॒मः । ओ॒ष॒धयः॑ । वै । ए॒तम् । प्र॒जा॒या इति॑ प्र - जायै॑ ।
परी॑ति । बा॒धन्ते॑ । यः । अ॒लम् । प्र॒जा॒या इति॑ प्र - जायै॑ । सन् ।
प्र॒जा॒मिति॑ प्र-ा॒म् । न । वि॒न्दते॑ । ओ॒ष॒धयः॑ । खलु॒ । वै । ए॒तस्यै॑ ।
सू॒तुम् । अपी॑ति । घ्नन्ति॒ । या । वे॒हत् । भ॒वति॑ । ओ॒ष॒धीः । ए॒व ।
स्वे॒न । भा॒ग॒धेये॒नेति॑ भा॒ग - धेये॒न । उपे॑ति । धाव॒ति । ताः । ए॒व ।

अ॒स्मै । स्वा॒त् । यो॒नैः । प्र॒जा॒मि॒ति॒ प्र – जा॒म् । प्रे॒ति॒ । ज॒न॒य॒न्ति॒ ।
वि॒न्द॒ते॒ । 31(50)

2.1.5.4

प्र॒जा॒मा॒पो॒ वा ओ॒ष॒ध॒योऽस॒त् पु॒रु॒ष आ॒प ए॒वा॒स्मा अ॒स॒तः स॒द॒द॒ति॒
त॒स्मा॒दा॒हु॒र्यश्चै॒वं वे॒द यश्च॒ ना॒प॒स्त्वा॒वा॒स॒तः स॒द॒द॒ती-त्यै॒न्द्री॑
सू॒त॒व॒शा॒मा ल॒भे॒त भू॒ति॒का॒मोऽजा॒तो वा ए॒ष योऽलं॒ भू॒त्यै स॒न् भू॒तिं
न प्रा॒प्नो॒ती॒न्द्रं ख॒लु वा ए॒षा सू॒त्वा व॒शाऽभ॒व – [] 32

2.1.5.4 (Padam)

प्र॒जा॒मि॒ति॒ प्र – जा॒म् । आ॒पः । वै । ओ॒ष॒ध॒यः । अ॒स॒त् । पु॒रु॒षः ।
आ॒पः । ए॒व । अ॒स्मै । अ॒स॒तः । स॒त् । द॒द॒ति॒ । त॒स्मा॒त् । आ॒हुः ।
यः । च । ए॒वम् । वे॒द । यः । च । न । आ॒पः । तु । वा॒व ।
अ॒स॒तः । स॒त् । द॒द॒ति॒ । इ॒ति॒ । ऐ॒न्द्री॑म् । सू॒त॒व॒शा॒मि॒ति॒
सू॒त – व॒शा॒म् । ए॒ति॒ । ल॒भे॒त । भू॒ति॒का॒म इ॒ति॒ भू॒ति – का॒मः ।
अ॒जा॒तः । वै । ए॒षः । यः । अ॒ल॒म् । भू॒त्यै । स॒न् । भू॒ति॒म् । न ।
प्रा॒प्नो॒ती॒ति॒ प्र – आ॒प्नो॒ति॒ । इ॒न्द्र॒म् । ख॒लु । वै । ए॒षा । सू॒त्वा ।

वशा । अभवत् । 32 (50)

2.1.5.5

–दिन्द्र॑मे॒व स्वे॑न॒ भा॒ग॒धे॒ये॒नो॒प॒ धा॒व॒ति॒ स ए॒वैनं॑ भू॒तिं॑ ग॒म॒य॒ति॒
भ॒व॒त्ये॒व य॑ꣳ सू॒त्वा व॒शा स्या॑त् त॒मैन्द्र॑मे॒वाऽऽ* ल॒भे॒तै॒तद्वा॒व
तदिन्द्रि॑यꣳ सा॒क्षादे॒वेन्द्रि॑य॒मव॑ रु॒न्ध ऐन्द्रा॑ग्नं पु॒नरु॑थ् सृ॒ष्ट॒मा ल॒भे॒त य
आ तृ॒तीया॑त् पु॒रुषा॑थ् सो॒मं न पि॒बेद्–वि॒च्छि॒न्नो वा ए॒तस्य॑
सो॒मपी॒थो यो ब्रा॒ह्म॒णः स॒न्ना – [] 33

2.1.5.5 (Padam)

इन्द्र॑म् । ए॒व । स्वे॑न॒ । भा॒ग॒धे॒ये॒ने॒ति भा॒ग – धे॒ये॒न । उ॒पे॒ति॒ ।
धा॒व॒ति॒ । सः । ए॒व । ए॒नम् । भू॒तिम् । ग॒म॒य॒ति॒ । भ॒व॒ति॒ । ए॒व ।
यम् । सू॒त्वा । व॒शा । स्या॑त् । तम् । ऐन्द्र॑म् । ए॒व । ए॒ति॒ । ल॒भे॒त ।
ए॒तत् । वा॒व । तत् । इन्द्रि॑यम् । सा॒क्षादि॑ति॒ स – अ॒क्षात् । ए॒व ।
इन्द्रि॑यम् । अ॒वे॒ति॒ । रु॒न्धे॒ । ऐन्द्रा॑ग्न॒मित्यैन्द्र॑ – अ॒ग्नम् ।
पु॒नरु॑थ्सृ॒ष्टमि॑ति॒ पु॒नः – उ॒थ्सृ॒ष्टम् । ए॒ति॒ । ल॒भे॒त । यः ।
ए॒ति॒ । तृ॒तीया॑त् । पु॒रुषा॑त् । सो॒मम् । न । पि॒बे॒त् ।

वि॒च्छि॒न्न इति॑ वि – छि॒न्नः । वै । ए॒तस्य॑ । सो॒मपी॒थः इति॑

सो॒म – पी॒थः । यः । ब्रा॒ह्म॒णः । स॒न् । ए॒ति । 33 (50)

2.1.5.6

तृ॒तीया॒त् पु॒रुषा॒थ् सो॒मं न पि॒बती॑न्द्रा॒ग्नी ए॒व स्वे॒न भा॒गधे॒येनो॑प
धा॒वति॑ तावे॒वास्मै॑ सो॒मपी॒थं प्र॒यच्छ॑त उ॒पैन्ꣳ सो॒मपी॒थो न॒मति॑
यदै॒न्द्रो भ॒वती॑न्द्रि॒यं वै सो॒मपी॒थ इन्द्रि॒यमे॒व सो॒मपी॒थम॒व रु॒न्धे
यदा॒ग्नेयो॑ भ॒वत्या॒ग्नेयो॑ वै ब्रा॒ह्म॒णः स्वा॒मे॒व दे॒वता॑मनु॒ संत॑नोति
पुन॒रुथ्सृ॑ष्टो भ॒वति॑ पुन॒रुथ्सृ॑ष्ट इ॒व ह्ये॒तस्य॑ – [] 34

2.1.5.6 (Padam)

तृ॒तीया॒त् । पु॒रुषा॒त् । सो॒मम् । न । पि॒बति॑ । इन्द्रा॒ग्नी
इती॑न्द्र – अ॒ग्नी । ए॒व । स्वे॒न । भा॒गधे॒येनेति॑ भा॒ग-धे॒येन॑ । उ॒पेति॑ ।
धा॒वति॑ । तौ । ए॒व । अ॒स्मै । सो॒मपी॒थमिति॑ सो॒म – पी॒थम् । प्रेति॑ ।
य॒च्छतः॑ । उ॒पेति॑ । ए॒नम् । सो॒मपी॒थ इति॑ सो॒म – पी॒थः । न॒मति॑ ।
यत् । ऐ॒न्द्रः । भ॒वति॑ । इन्द्रि॒यम् । वै । सो॒मपी॒थ इति॑ सो॒म-पी॒थः ।
इन्द्रि॒यम् । ए॒व । सो॒मपी॒थमिति॑ सो॒म – पी॒थम् । अ॒वेति॑ । रु॒न्धे ।

यत् । आग्ने॑यः । भव॑ति । आग्ने॑यः । वै । ब्राह्म॑णः । स्वाम् । ए॒व ।
 दे॒वता॑म् । अनु॑ । समि॑ति । त॒नोति॑ । पु॒नरु॑त्सृष्ट इति पुनः-उ॒त्सृष्टः॑ ।
 भव॑ति । पु॒नरु॑त्सृष्ट इति पुनः – उ॒त्सृष्टः॑ । इ॒व । हि॒ ।

ए॒तस्य॑ । 34 (50)

2.1.5.7

सो॒मपी॑थः समृ॑द्ध्यै ब्राह्म॑णस्प॒त्यं तू॒पर॑मा ल॒भेता॑-भि॒चरन्
 ब्राह्म॑णस्प॒तिमे॒व स्वे॑न भा॒गधे॑ये॒नोप॑ धाव॒ति तस्मा॑ ए॒वैन॑मा वृ॒श्चति॑
 ताज॑गार्ति-मा॒च्छति॑ तू॒परो॑ भव॒ति क्षु॒रप॑वि॒र्वा ए॒षा ल॒क्ष्मी॑ यत् तू॒परः
 समृ॑द्ध्यै स्फ्यो॑ यू॒पो भव॑ति वज्रो॑ वै स्फ्यो॑ वज्र॒मेवा॒स्मै प्र॑हर॒ति
 श॒रम॑यं ब॒र्हिः शृ॒णात्ये॒वैनं॑ वैभी॒दक॑ इ॒ध्मो () भि॒नत्ये॒वैनं॑ । 35

2.1.5.7 (Padam)

सो॒मपी॑थ इति सो॒म – पी॑थः । समृ॑द्ध्यै इति सं – ऋ॒द्ध्यै॑ ।
 ब्राह्म॑णस्प॒त्यमि॑ति ब्राह्म॑णः – प॒त्यम् । तू॒पर॑म् । ए॒ति । ल॒भेता॑ ।
 अ॒भिच॑रन्नित्य॒भि – च॑रन् । ब्राह्म॑णः । प॒तिम् । ए॒व । स्वे॑न ।
 भा॒गधे॑ये॒नेति॑ भा॒ग – धे॑ये॒न । उ॒पेति॑ । धा॒वति॑ । तस्मै॑ ।

ए॒व । ए॒नम् । ए॒ति । वृ॒श्च॒ति । ता॒जक् । आ॒र्ति॒म् । ए॒ति । ऋ॒च्छ॒ति ।

तू॒परः । भ॒व॒ति । क्षु॒रप॒वि॒रिति॑ क्षु॒र – प॒विः । वै ।

ए॒षा । ल॒क्ष्मी॑ । यत् । तू॒परः । स॒मृ॒द्ध्य॒ा इति॑ सं – ऋ॒द्ध्यै॑ ।

स्फ्यः॑ । यू॒पः । भ॒व॒ति । वज्रः॑ । वै । स्फ्यः॑ । वज्र॑म् । ए॒व ।

अ॒स्मै । प्रे॒ति । ह॒र॒ति । श॒र॒म॒य॒मिति॑ श॒र – म॒य॒म् । ब॒र्हिः ।

शृ॒णा॒ति । ए॒व । ए॒नम् । वैभी॑दकः । इ॒ध्मः () । भि॒न॒त्ति ।

ए॒व । ए॒नम् । 35 (53)

(भ॒व॒त्यु॒न्नतः॑ – प॒श॒वो॑ – ज॒न॒य॒न्ति॑ वि॒न्द॒ते॑ – ऽभ॒व॒त् – स॒न्नै –
त॒स्ये॑ – ध॒म – स्त्री॑णि च) (A5)

2.1.6.1

बा॒र्ह॒स्प॒त्य॑ ऽ शि॒ति॒पृ॒ष्ठ॒मा ल॒भे॒त॒ ग्रा॒म॒का॒मो॒ यः का॒म॒र्ये॒त॒ पृ॒ष्ठ॑
स॒मा॒ना॒ना॑ ऽ स्या॒मि॒ति॒ बृ॒ह॒स्प॒ति॒मे॒व स्वे॒न भा॒ग॒धे॒ये॒नो॒प धा॒व॒ति॒ स ए॒वैनं॑
पृ॒ष्ठ॑ स॒मा॒ना॒नां॑ क॒रो॒ति॒ ग्रा॒म्ये॒व भ॒व॒ति॒ शि॒ति॒पृ॒ष्ठो भ॒व॒ति॒ बा॒र्ह॒स्प॒त्यो
ह्ये॒ष दे॒व॒त॒या स॒मृ॒द्ध्यै॑ पौ॒ष्णा॑ ऽ श्या॒म॒मा ल॒भे॒त॒ान्न॒का॒मो॒ऽन्नं॑ वै पू॒षा

पू॒षण॑मे॒व स्वे॑न भा॒गधे॑ये॒नोप॑ धावति॒ स ए॒वास्मा॑ – [] 36

2.1.6.1 (Padam)

बा॒र्ह॒स्प॒त्यम् । शि॒ति॒पृ॒ष्ठमि॑ति॒ शि॒ति – पृ॒ष्ठम् । ए॒ति ।
ल॒भे॒त । ग्रा॒मका॑म इति॒ ग्रा॒म – का॒मः । यः । का॒मये॑त ।
पृ॒ष्ठम् । स॒मा॒ना॒नाम् । स्या॒म् । इति॑ । बृ॒ह॒स्प॒तिम् । ए॒व ।
स्वे॑न । भा॒गधे॑ये॒नेति॑ भा॒ग – धे॑ये॒न । उ॒पेति॑ । धा॒वति॑ ।
सः । ए॒व । ए॒नम् । पृ॒ष्ठम् । स॒मा॒ना॒नाम् । क॒रोति॑ । ग्रा॒मी ।
ए॒व । भ॒वति॑ । शि॒ति॒पृ॒ष्ठ इति॑ शि॒ति – पृ॒ष्ठः । भ॒वति॑ ।
बा॒र्ह॒स्प॒त्यः । हि । ए॒षः । दे॒वत॑या । स॒मृ॒द्ध्य॑ इति॒ सं – ऋ॒द्ध्यै॑ ।
पौ॒ष्णम् । श्या॒मम् । ए॒ति । ल॒भे॒त । आ॒न्नका॑म इत्य॒न्न – का॒मः ।
अ॒न्नम् । वै । पू॒षा । पू॒षण॑म् । ए॒व । स्वे॑न । भा॒गधे॑ये॒नेति॑
भा॒ग – धे॑ये॒न । उ॒पेति॑ । धा॒वति॑ । सः । ए॒व । अ॒स्मै । 36 (50)

2.1.6.2

अ॒न्नं प्र॑ य॒च्छत्य॑न्ना॒द ए॒व भ॑वति॒ श्या॒मो भ॑वत्ये॒तद्वा॑ अ॒न्नस्य॑ रू॒पं
स॒मृ॒द्ध्यै॑ मा॒रुतं॑ पृ॒श्नि॒मा ल॒भे॒ताऽन्न॑-का॒मोऽन्नं॑ वै म॒रुतो॑म॒रुत॑ ए॒व

स्वेन॑ भा॒ग॒धे॒येनो॑प॒ धा॒वति॑ त ए॒वास्मा॑ अन्नं॒ प्रय॑च्छन्त्यन्नाद॒एव॑ भवति॒
पृ॒श्नि॑ भवत्येतद्वा॒ अन्न॑स्य रूपं॒ समृ॑द्ध्य॒ आ॒ ऐन्द्र॑मरुणमा
ल॒भेतेन्द्रि॑यकाम॒ इन्द्र॑मेव – [] 37

2.1.6.2 (Padam)

अन्न॑म् । प्रेति॑ । य॒च्छति॑ । अ॒न्नाद॑ इत्यन्न – अ॒दः । ए॒व । भ॒वति॑ ।
श्यामः॑ । भ॒वति॑ । ए॒तत् । वै । अन्न॑स्य । रू॒पम् ।
समृ॑द्ध्य॒ इति॑ सं – ऋ॒द्ध्यै । मा॒रुत॑म् । पृ॒श्नि॑म् । ए॒ति । ल॒भेत॑ ।
अन्न॑काम॒ इत्यन्न॑ – का॒मः । अन्न॑म् । वै । म॒रुतः॑ । म॒रुतः॑ । ए॒व ।
स्वेन॑ । भा॒ग॒धे॒येनेति॑ भा॒ग – धे॒येन॑ । उ॒पेति॑ । धा॒वति॑ । ते । ए॒व ।
अ॒स्मै । अन्न॑म् । प्रेति॑ । य॒च्छन्ति॑ । अ॒न्नाद॑ इत्यन्न – अ॒दः । ए॒व ।
भ॒वति॑ । पृ॒श्निः । भ॒वति॑ । ए॒तत् । वै । अन्न॑स्य । रू॒पम् ।
समृ॑द्ध्य॒ इति॑ सं – ऋ॒द्ध्यै । ऐन्द्र॑म् । अ॒रुण॑म् । ए॒ति ।
ल॒भेत॑ । इन्द्रि॑यकाम॒ इतीन्द्रि॑य – का॒मः । इन्द्र॑म् । ए॒व । 37 (50)

2.1.6.3

स्वेन॑ भा॒गधे॒येनो॑प॒ धाव॑ति॒ स ए॒वास्मि॑न्निन्द्रि॒यं द॑धातीन्द्रि॒याव्ये॑व
भव॑त्यरु॒णो भ्रू॑मान् भव॑त्येतद्वा इन्द्र॑स्य रू॒पꣳ स॑मृद्ध्यै
सावि॑त्रमु॒पध्व॑स्तमा ल॒भेत॑ स॒निका॑मः स॒विता॑ वै प्र॒सवा॑नामी॒शे
सवि॑तारमे॒व स्वेन॑ भा॒गधे॒येनो॑प॒ धाव॑ति॒ स ए॒वास्मै॑ स॒निं प्र॑सुवति
दा॒नका॑मा अ॒स्मै प्र॒जा भव॑न्त्यु॒पध्व॑स्तो भव॑ति सावि॒त्रो ह्ये॑ष- [] 38

2.1.6.3 (Padam)

स्वेन॑ । भा॒गधे॒येने॑ति॒ भाग॑ – धे॒येन॑ । उ॒पेति॑ । धा॒वति॑ । सः ।
ए॒व । अ॒स्मिन् । इन्द्रि॒यम् । द॑धाति । इन्द्रि॒यावी॑ । ए॒व । भव॑ति ।
अ॒रुणः॑ । भ्रू॑मा॒निति॑ भ्रु – मा॒न् । भव॑ति । ऐ॒तत् । वै । इन्द्र॑स्य ।
रू॒पम् । स॑मृद्ध्यै इति॒ सं – ऋ॒द्ध्यै॑ । सा॒वि॒त्रम् ।
उ॒पध्व॑स्तमित्यु॒प – ध्व॑स्तम् । ए॒ति । ल॒भेत॑ । स॒निका॑म इति॒
स॒नि – का॑मः । स॒विता॑ । वै । प्र॒सवा॑नामिति॒ प्र-स॑वा॒नाम् । ई॒शे ।
सवि॑तारम् । ए॒व । स्वेन॑ । भा॒गधे॒येने॑ति॒ भाग॑ – धे॒येन॑ । उ॒पेति॑ ।
धा॒वति॑ । सः । ए॒व । अ॒स्मै । स॒निम् । प्रे॑ति । सु॒वति॑ ।

दान॒कामा॒ इति॑ दान॒-कामाः॑ । अ॒स्मै । प्र॒जा इति॑ प्र-जाः । भव॒न्ति ।
उप॒ध्वस्त॑ इत्युप - ध्वस्तः । भव॒ति । सा॒वित्रः॑ । हि । ए॒षः । 38 (50)

2.1.6.4

दे॒वतया॑ समृ॒द्ध्यै॑ वै॒श्वदे॒वं बहु॑रूपमा ल॒भेता॑ऽन्न॒कामो॑वै॒श्वदे॒वं वा
अन्नं॑ वि॒श्वाने॒व दे॒वान्-स्वेन॑ भा॒गधे॒येनो॑प धाव॒ति त ए॒वास्मा॑ अन्नं
प्रय॑च्छन्त्यन्नाद ए॒व भव॑ति बहु॒रूपो॑ भव॒ति बहु॑रूपः॒ ह्यन्नं॑ समृ॒द्ध्यै
वै॒श्वदे॒वं बहु॑रूपमा ल॒भेत॑ ग्रा॒मका॒मो वै॒श्वदे॒वा वै स॒जाता॑ वि॒श्वाने॒व
दे॒वान्-स्वेन॑ भा॒गधे॒येनो॑प धाव॒ति त ए॒वास्मै॑ - [] 39

2.1.6.4 (Padam)

दे॒वतया॑ । समृ॒द्ध्यै॑ इति॑ सं - ऋ॒द्ध्यै । वै॒श्वदे॒वमि॑ति॒ वैश्व॑-दे॒वम् ।
बहु॑रूपमि॒ति बहु॑ - रू॒पम् । ए॒ति । ल॒भेत॑ । अन्न॒काम
इत्य॑न्न - का॒मः । वै॒श्वदे॒वमि॑ति॒ वैश्व॑ - दे॒वम् । वै । अन्न॑म् ।
वि॒श्वान् । ए॒व । दे॒वान् । स्वेन॑ । भा॒गधे॒येने॑ति॒ भाग॑-धे॒येन॑ । उ॒पेति॑ ।
धाव॑ति । ते । ए॒व । अ॒स्मै । अन्न॑म् । प्रे॒ति । य॒च्छन्ति॑ ।
अन्ना॑द इत्य॑न्न - अ॒दः । ए॒व । भव॑ति । बहु॑रूपमि॒ति बहु॑-रू॒पः ।

भवति । ब॒हुरूपमि॑ति बहु – रूपम् । हि । अन्नम् । समृ॑द्ध्य॒ इति
सं – ऋ॒द्ध्यै । वै॒श्वदे॑वमि॒ति वै॒श्व – दे॒वम् । ब॒हुरूपमि॑ति
बहु – रूपम् । एति । ल॒भेत॑ । ग्राम॑काम॒ इति॑ ग्राम – का॒मः ।
वै॒श्वदे॑वा इति॑ वै॒श्व – दे॒वाः । वै । स॒जा॒ता इति॑ स – जा॒ताः ।
वि॒श्वान् । ए॒व । दे॒वान् । स्वे॒न । भा॒ग॒धे॒येने॑ति॒ भा॒ग॒धे॒येन॑ । उ॒पेति॑ ।
धा॒वति॑ । ते । ए॒व । अ॒स्मै । 39 (50)

2.1.6.5

स॒जा॒तान् प्र॑ यच्छन्ति॒ ग्राम्ये॑व भवति॒ बहु॒रूपो॑ भवति॒ बहु॒दे॒वत्यो॑ (1)
ह्येष॑ समृ॑द्ध्यै प्रजा॒पत्यं॑ तू॒पर॒मा ल॒भेत॑ यस्याना॒ज्ञातमि॑व
ज्यो॒गाम॑येत् प्राजा॒पत्यो॑ वै पु॒रुषः॑ प्रजा॒पतिः॑ खलु॒ वै तस्य॑ वेद
यस्याना॒ज्ञातमि॑व ज्यो॒गाम॑यति॒ प्रजा॒पति॑मे॒व स्वे॒न भा॒ग॒धे॒येनो॑प॒ धा॒वति॑
स ए॒वैनं॑ तस्मा॒त् स्रामान्॑-मुञ्चति॒ तू॒परो॑ भवति॒ प्राजा॒पत्यो॑ ह्ये ()
-ष दे॒वतया॑ समृ॑द्ध्यै । 40

2.1.6.5 (Padam)

स॒जा॒ता॒नि॒ति॒ स-जा॒तान् । प्रेति॑ । य॒च्छन्ति॑ । ग्रा॒मी । ए॒व । भ॒वति॑ ।
ब॒हु॒रूप॑ इति॑ बहु॑ - रू॒पः । भ॒वति॑ । ब॒हु॒दे॒वत्य॑ इति॑ बहु॑-दे॒वत्यः॑ ।
हि । ए॒षः । स॒मृ॒द्ध्य॑ इति॑ सं - ऋ॒द्ध्यै॑ । प्र॒जा॒पत्य॑मिति॑
प्रा॒जा - प॒त्यम् । तू॒परम् । एति॑ । ल॒भेत॑ । य॒स्य ।
अ॒ना॒ज्ञा॒तमि॒त्यना॑ - ज्ञा॒तम् । इ॒व । ज्योक् । आ॒मये॑त् ।
प्रा॒जा॒पत्य॑ इति॑ प्रा॒जा - प॒त्यः । वै । पु॒रुषः॑ ।
प्र॒जा॒पति॑रिति॑ प्र॒जा - प॒तिः । ख॒लु । वै । त॒स्य । वे॒द । य॒स्य ।
अ॒ना॒ज्ञा॒तमि॒त्यना॑ - ज्ञा॒तम् । इ॒व । ज्योक् । आ॒मय॑ति ।
प्र॒जा॒पति॑मिति॑ प्र॒जा - प॒तिम् । ए॒व । स्व॑ेन । भा॒गधे॑येनेति॑
भा॒ग - धे॑येन । उ॒पेति॑ । धा॒वति॑ । सः । ए॒व । ए॒नम् । तस्मा॑त् ।
स्रा॒मात् । मु॒ञ्च॑ति । तू॒परः॑ । भ॒वति॑ । प्रा॒जा॒पत्य॑ इति॑ प्रा॒जा-प॒त्यः ।
हि () । ए॒षः । दे॒वत॑या । स॒मृ॒द्ध्य॑ इति॑ सं - ऋ॒द्ध्यै॑ । 40 (53)

(अ॒स्मा – इ॒न्द्र॒मे॒वै – ष – स॒जा॒ता वि॒श्वा॒ने॒व दे॒वान्त् स्वे॒न
भा॒ग॒धे॒ये॒नो॒प॒ धा॒व॒ति॒ त ए॒वा॒स्मै – प्रा॒जा॒प॒त्यो हि – त्री॒णि च॑)(A6)
2.1.7.1

व॒षट्का॒रो वै गाय॑त्रि॒यै शि॒रोऽच्छि॑नत् तस्यै॑ र॒सः प॒राप॑तत् तं
बृ॒हस्प॑ति॒ रुपा॑ऽगृ॒ह्णात्सा शि॑तिपृ॒ष्ठा व॒शाऽभ॑वद्दो द्वि॒तीयः प॒राऽप॑तत्
तं मि॒त्राव॑रु॒णा-वु॒पागृ॑ह्णी॒ता सा द्वि॒रूपा व॒शाऽभ॑वद्-यस्तृ॒तीयः
प॒राप॑तत् तं वि॒श्वे दे॒वा उ॒पागृ॑ह्णन्त् सा ब॒हुरू॒पा व॒शा भ॑वद्-
श्चतु॑र्त्थः प॒राप॑तत् स पृ॒थि॒वीं प्रा॑वि॒शत् तं बृ॒हस्प॑तिर॒भ्य – [] 41

2.1.7.1 (Padam)

व॒षट्का॒र इति॑ व॒षट् – का॒रः । वै । गाय॑त्रि॒यै । शि॒रः । अ॒च्छि॑नत् ।
तस्यै॑ । र॒सः । प॒रेति॑ । अ॒प॒त॒त् । तम् । बृ॒हस्प॑तिः । उ॒पेति॑ ।
अ॒गृ॒ह्णात् । सा । शि॑तिपृ॒ष्ठेति॑ शि॒ति – पृ॒ष्ठा । व॒शा । अ॒भ॒व॒त् ।
यः । द्वि॒तीयः । प॒राप॑तदिति॑ प॒रा – अ॒प॒त॒त् । तम् ।
मि॒त्राव॑रु॒णावि॑ति॒ मि॒त्रा – व॑रु॒णौ । उ॒पेति॑ । अ॒गृ॒ह्णी॒ताम् । सा ।
द्वि॒रूपे॑ति॒ द्वि – रू॒पा । व॒शा । अ॒भ॒व॒त् । यः । तृ॒तीयः ।

पराप॒त॒दि॒ति॒ परा॑ – अप॒तत् । तम् । वि॒श्वे॑ । दे॒वाः । उपे॒ति॒ ।

अ॒गृ॒ह्णा॒न् । सा । ब॒हु॒रूपे॑ति॒ बहु॑ – रू॒पा । व॒शा । अ॒भव॒त् । यः ।

चतु॑र्थः । पराप॒त॒दि॒ति॒ परा॑ – अप॒तत् । सः । पृ॒थि॒वीम् । प्रे॒ति॒ ।

अ॒वि॒शत् । तम् । बृ॒ह॒स्प॒तिः॑ । अ॒भी॒ति॒ । 41 (50)

2.1.7.2

–गृ॒ह्णा–द॒स्त्वे॒वायं॑ भो॒गाये॑ति॒ स उ॒क्ष॒व॒शः॑ स॒म॒भव॒द्–य॒ल्लो॒हि॒तं
पराप॒तत् तद्–रु॒द्र उपा॑ऽगृ॒ह्णाथ् सा रौ॒द्री रो॒हि॒णी व॒शाऽभ॒वद्–
बा॒र्ह॒स्प॒त्याꣳ शि॒ति॒पृ॒ष्ठा॒मा ल॒भे॒त ब्र॒ह्म॒व॒र्च॒स॒का॒मो बृ॒ह॒स्प॒ति॒मे॒व
स्वे॒न भा॒ग॒धे॒ये॒नोप॑ धा॒वति॑ स ए॒वास्मि॑न् ब्र॒ह्म॒व॒र्च॒सं द॒धाति॑
ब्र॒ह्म॒व॒र्च॒स्ये॒व भ॒वति॑ छ॒न्द॒सां वा॑ ए॒ष र॒सो य॒द्व॒शा र॒स

इ॒व ख॒लु– [] 42

2.1.7.2 (Padam)

अ॒गृ॒ह्णा॒त् । अ॒स्तु॒ । ए॒व । अ॒यम् । भो॒गाय॑ । इ॒ति॒ । सः ।

उ॒क्ष॒व॒श इ॒त्यु॒क्ष – व॒शः॑ । स॒मि॒ति॒ । अ॒भव॒त् । यत् । लो॒हि॒तम् ।

पराप॒त॒दि॒ति॒ परा॑ – अप॒तत् । तत् । रु॒द्रः । उपे॒ति॒ । अ॒गृ॒ह्णा॒त् ।

सा । रौ॒द्री । रो॒हिणी । व॒शा । अ॒भवत् । बा॒र्ह॒स्प॒त्याम् ।
 शि॒ति॒पृ॒ष्ठामि॒ति शि॒ति – पृ॒ष्ठाम् । ए॒ति । ल॒भे॒त ।
 ब्र॒ह्म॒व॒र्च॒स॒का॒म इति॑ ब्र॒ह्म॒व॒र्च॒स – का॒मः । बृ॒ह॒स्प॒ति॒म् ।
 ए॒व । स्वे॒न । भा॒ग॒धे॒ये॒नेति॑ भा॒ग – धे॒ये॒न । उ॒पे॒ति । धा॒व॒ति ।
 सः । ए॒व । अ॒स्मिन् । ब्र॒ह्म॒व॒र्च॒स॒मि॒ति ब्र॒ह्म – व॒र्च॒सम् ।
 द॒धा॒ति । ब्र॒ह्म॒व॒र्च॒सी॒ति ब्र॒ह्म – व॒र्च॒सी । ए॒व । भ॒व॒ति । छ॒न्द॒साम् ।
 वै । ए॒षः । र॒सः । यत् । व॒शा । र॒सः । इ॒व । ख॒लु । 42 (50)

2.1.7.3

वै ब्र॒ह्म॒व॒र्च॒सं छ॒न्द॒सामे॒व र॒से॒न र॒सं ब्र॒ह्म॒व॒र्च॒स॒म॒व रु॒न्धे मै॒त्रा॒व॒रु॒णीं
 द्वि॒रू॒पा॒मा ल॒भे॒त वृ॒ष्टि॒का॒मो मै॒त्रं वा॑ अ॒ह॒र्वा॒रु॒णी रा॒त्रि॒र॒हो॒रा॒त्रा॒भ्यां
 ख॒लु वै प॒र्ज॒न्यो व॒र्ष॒ति मि॒त्रा॒व॒रु॒णा॒वे॒व स्वे॒न भा॒ग॒धे॒ये॒नो॒प धा॒व॒ति
 ता॒वे॒वा॒स्मा अ॒हो॒रा॒त्रा॒भ्यां प॒र्ज॒न्यं वा॑ व॒र्ष॒य॒तः छ॒न्द॒सां वा॑ ए॒ष र॒सो
 य॒द्व॒शा र॒स इ॒व ख॒लु वै वृ॒ष्टिः छ॒न्द॒सामे॒व र॒से॒न – [] 43

2.1.7.3 (Padam)

वै । ब्र॒ह्मव॑र्चसमि॒ति ब्र॒ह्म – वर्च॑सम् । छ॒न्दसाम् । ए॒व । र॒सेन॑ ।
र॒सम् । ब्र॒ह्मव॑र्चसमि॒ति ब्र॒ह्म – वर्च॑सम् । अ॒वेति॑ । रु॒न्धे ।
मै॒त्राव॑रुणीमि॒ति मै॒त्रा – व॒रुणी॑म् । द्वि॒रूपा॑मि॒ति द्वि – रू॒पा॒म् ।
ए॒ति । ल॒भेत॑ । वृ॒ष्टि॒काम॑ इति॒ वृ॒ष्टि – का॒मः । मै॒त्रम् । वै ।
अ॒हः । वा॒रुणी॑ । रा॒त्रिः । अ॒हो॒रा॒त्राभ्या॑मित्य॒हः – रा॒त्राभ्या॑म् ।
ख॒लु । वै । प॒र्जन्यः॑ । व॒र्ष॒ति । मि॒त्राव॑रुणा॒विति॑ मि॒त्रा – व॒रुणौ॑ ।
ए॒व । स्वे॒न । भा॒गधे॑ये॒नेति॑ भा॒ग – धे॑ये॒न । उ॒पेति॑ । धा॒वति॑ । तौ ।
ए॒व । अ॒स्मै । अ॒हो॒रा॒त्राभ्या॑मित्य॒हः – रा॒त्राभ्या॑म् । प॒र्जन्य॑म् ।
व॒र्ष॒यतः॑ । छ॒न्दसाम् । वै । ए॒षः । र॒सः । यत् । व॒शा ।
र॒सः । इ॒व । ख॒लु । वै । वृ॒ष्टिः । छ॒न्दसाम् । ए॒व । र॒सेन॑ । 43 (50)

2.1.7.4

र॒सं वृ॒ष्टि॒मव॑ रु॒न्धे मै॒त्राव॑रुणीं द्वि॒रूपा॑मा ल॒भेत॑ प्र॒जाका॑मो
मै॒त्रं वा॑ अ॒हर्वा॑रुणी रा॒त्रिर॑हो॒रा॒त्राभ्यां॑ ख॒लु वै प्र॒जाः प्र॒जाय॑न्ते
मि॒त्राव॑रुणा॒वेव॑ स्वे॒न भा॒गधे॑ये॒नोप॑ धा॒वति॑ ता॒वेवा॑स्मा अ॒हो॒रा॒त्राभ्यां॑

प्र॒जां प्र॒जनय॑तः छ॒न्दसां॑ वा ए॒ष रसो॑ यद्व॒शा रस॑ इ॒व खलु॑ वै
प्र॒जा छ॒न्दसामे॑व रसे॒न रसं॑ प्र॒जाम॑व – [] 44

2.1.7.4 (Padam)

र॒सम् । वृ॒ष्टिम् । अ॒वेति॑ । रु॒न्धे । मै॒त्राव॑रु॒णीमि॑ति मै॒त्रा – व॑रु॒णीम् ।
द्वि॒रूपा॑मि॒ति द्वि॑ – रू॒पां । ए॒ति । ल॒भेत॑ । प्र॒जाका॑म इति॑
प्र॒जा – का॒मः । मै॒त्रम् । वै । अ॒हः । वा॒रुणी॑ । रा॒त्रिः ।
अ॒हो॒रा॒त्राभ्या॑मि॒त्यहः॑ – रा॒त्राभ्या॑म् । खलु॑ । वै । प्र॒जा इति॑
प्र – जाः । प्रेति॑ । जा॒यन्ते॑ । मि॒त्राव॑रु॒णावि॑ति मि॒त्रा-व॑रु॒णौ । ए॒व ।
स्वे॒न । भा॒गधे॑ये॒नेति॑ भा॒ग – धे॑ये॒न । उ॒पेति॑ । धा॒वति॑ । तौ । ए॒व ।
अ॒स्मै । अ॒हो॒रा॒त्राभ्या॑मि॒त्यहः॑ – रा॒त्राभ्या॑म् । प्र॒जामि॑ति प्र – जा॒म् ।
प्रेति॑ । ज॒नय॑तः । छ॒न्दसा॑म् । वै । ए॒षः । र॒सः । यत् । व॒शा ।
र॒सः । इ॒व । खलु॑ । वै । प्र॒जेति॑ प्र-जा । छ॒न्दसा॑म् । ए॒व । र॒सेन॑ ।
र॒सम् । प्र॒जामि॑ति प्र – जा॒म् । अ॒वेति॑ । 44 (50)

2.1.7.5

रुन्धे॑ वै॒श्वदे॒वीं बहु॑रूपा॒मा ल॒भेता॑न्न॒कामो॑ वै॒श्वदे॒वं वा॑ अन्नं
वि॒श्वाने॑व दे॒वान्त् स्वे॑न भा॒गधे॑येनोप॒ धाव॑ति त ए॒वास्मा॑ अन्नं
प्रय॑च्छन्त्यन्नाद ए॒व भव॑ति छन्द॒सां वा॑ ए॒ष रसो॑ यद्व॒शा रस॑ इ॒व
खलु॑ वा अन्नं छन्द॒सामे॑व रसे॒न रस॑मन्नम॒व रुन्धे॑ वै॒श्वदे॒वीं
बहु॑रूपा॒मा ल॒भेत॑ ग्राम॒कामो॑ वै॒श्वदे॒वा वै – [] 45

2.1.7.5 (Padam)

रुन्धे॑ । वै॒श्वदे॒वीमि॑ति वै॒श्व – दे॒वीम् । बहु॑रूपा॒मि॑ति बहु – रूपा॒म् ।
ए॒ति । ल॒भेत॑ । अन्न॒काम॑ इत्यन्न – का॒मः । वै॒श्वदे॒वमि॑ति
वै॒श्व – दे॒वम् । वै । अन्न॒म् । वि॒श्वान् । ए॒व । दे॒वान् । स्वे॑न ।
भा॒गधे॑येनेति भा॒ग – धे॑येन । उ॒पेति॑ । धा॒वति॑ । ते । ए॒व । अ॒स्मै ।
अन्न॒म् । प्रे॑ति । य॒च्छन्ति॑ । अन्ना॒द इत्यन्न – अ॒दः । ए॒व । भव॑ति ।
छन्द॒साम् । वै । ए॒षः । रसः॑ । यत् । व॒शा । रसः॑ । इ॒व । खलु॑ ।
वै । अन्न॒म् । छन्द॒साम् । ए॒व । रसे॑न । रस॒म् । अन्न॒म् । अवे॑ति ।
रुन्धे॑ । वै॒श्वदे॒वीमि॑ति वै॒श्व – दे॒वीम् । बहु॑रूपा॒मि॑ति बहु – रूपा॒म् ।

ए॒ति । ल॒भे॒त । ग्रा॒म॒का॒म इति॑ ग्रा॒म – का॒मः ।

वै॒श्व॒दे॒वा इति॑ वै॒श्व – दे॒वाः । वै । 45 (50)

2.1.7.6

स॒जा॒ता वि॒श्वा॒ने॒व दे॒वा॒न्त् स्वे॒न भा॒ग॒धे॒ये॒नो॒प धा॒वति॑ त ए॒वा॒स्मै
स॒जा॒ता॒न् प्र य॒च्छन्ति॑ ग्रा॒म्ये॒व भ॒वति॑ छ॒न्द॒सां वा॑ ए॒ष र॒सो यद्व॒शा
र॒स इ॒व ख॒लु वै स॒जा॒ताः छ॒न्द॒सामे॒व र॒से॒न र॒सꣳ स॒जा॒ता॒न॒व रु॒न्धे
बा॒र्ह॒स्प॒त्य- मु॒क्ष॒व॒श॒मा ल॒भे॒त ब्र॒ह्म॒व॒र्च॒स॒का॒मो बृ॒ह॒स्प॒ति॒मे॒व स्वे॒न
भा॒ग॒धे॒ये॒नो॒प धा॒वति॑ स ए॒वा॒स्मिन् ब्र॒ह्म॒व॒र्च॒सं – [] 46

2.1.7.6 (Padam)

स॒जा॒ता इति॑ स – जा॒ताः । वि॒श्वा॒न् । ए॒व । दे॒वा॒न् । स्वे॒न ।
भा॒ग॒धे॒ये॒ने॒ति भा॒ग – धे॒ये॒न । उ॒पे॒ति । धा॒वति॑ । ते । ए॒व । अ॒स्मै ।
स॒जा॒ता॒निति॑ स-जा॒ता॒न् । प्रे॒ति । य॒च्छन्ति॑ । ग्रा॒मी । ए॒व । भ॒वति॑ ।
छ॒न्द॒साम् । वै । ए॒षः । र॒सः । यत् । व॒शा । र॒सः । इ॒व । ख॒लु ।
वै । स॒जा॒ता इति॑ स – जा॒ताः । छ॒न्द॒साम् । ए॒व । र॒से॒न । र॒सम् ।
स॒जा॒ता॒निति॑ स – जा॒ता॒न् । अ॒वे॒ति । रु॒न्धे । बा॒र्ह॒स्प॒त्यम् ।

उ॒क्ष॒व॒श॒मि॒त्यु॒क्ष॒ – व॒श॒म् । ए॒ति । ल॒भे॒त ।

ब्र॒ह्म॒व॒र्च॒स॒का॒म॒ इति॑ ब्र॒ह्म॒व॒र्च॒स॒ – का॒मः॑ । बृ॒ह॒स्प॒ति॑म् । ए॒व ।

स्वे॒न । भा॒ग॒धे॒ये॒ने॒ति॑ भा॒ग॒ – धे॒ये॒न । उ॒पे॒ति॑ । धा॒व॒ति॑ । सः॑ । ए॒व ।

अ॒स्मि॒न् । ब्र॒ह्म॒व॒र्च॒स॒मि॒ति॑ ब्र॒ह्म॒ – व॒र्च॒स॒म् । 46 (50)

2.1.7.7

द॒धा॒ति॑ ब्र॒ह्म॒व॒र्च॒स्ये॒व॒ भ॒व॒ति॑ व॒शं॑ वा॒ ए॒ष॒ च॒र॒ति॑ यदु॒क्षा॒व॒श॑ इ॒व॒ ख॒लु॒
वै॒ ब्र॒ह्म॒व॒र्च॒सं॑ वा॒शे॒नै॒व॒ व॒शं॑ ब्र॒ह्म॒व॒र्च॒स॒म॒व॒ रु॒न्धे॒रौ॒द्री॒र्ो॒हि॒णी॒मा॒
ल॒भे॒ता॒भि॒च॒र॒न् रु॒द्र॒मे॒व॒ स्वे॒न॒ भा॒ग॒धे॒ये॒नो॒प॒ धा॒व॒ति॑ तस्मा॑ ए॒वै॒न॒मा॒
वृ॒श्च॒ति॑ ता॒ज॒गा॒र्ति॒मा॒च्छ॒ति॑ रो॒हि॒णी॒ भ॒व॒ति॑ रौ॒द्री॒ ह्ये॒षा॒ दे॒व॒त॒या॒ स॒मृ॒द्ध्यै॑
स्प॒त्यो॒ यू॒पो॒ () भ॒व॒ति॑ व॒ज्रो॒ वै॒ स्प॒त्यो॒ व॒ज्र॒मे॒वा॒स्मै॒ प्र॒ ह॒र॒ति॑ श॒र॒म॒यं॑
ब॒र्हिः॑ शृ॒णा॒त्ये॒वैनं॑ वै॒भी॒द॒क॒ इ॒ध्मो॒ भि॒न॒त्ये॒वैनं॑ । 47

2.1.7.7 (Padam)

द॒धा॒ति॑ । ब्र॒ह्म॒व॒र्च॒सी॒ति॑ ब्र॒ह्म॒ – व॒र्च॒सी॒ । ए॒व॒ । भ॒व॒ति॑ ।

व॒श॒म् । वै॒ । ए॒षः॑ । च॒र॒ति॑ । यत् । उ॒क्षा॒ । व॒शः॑ । इ॒व॒ । ख॒लु॒ । वै॒ ।

ब्र॒ह्म॒व॒र्च॒स॒मि॒ति॑ ब्र॒ह्म॒ – व॒र्च॒स॒म् । व॒शे॒न॒ । ए॒व॒ । व॒श॒म् ।

ब्र॒ह्मव॑र्चसमि॒ति ब्र॒ह्म – वर्च॑सम् । अवे॑ति । रु॒न्धे । रौ॒द्रीम् ।
 रो॒हिणी॑म् । ए॒ति । ल॒भे॒त । अ॒भि॒च॒र॒न्नि॒त्य॒भि॒-च॑रन् । रु॒द्रम् । ए॒व ।
 स्वे॒न । भा॒ग॒धे॒ये॒ने॒ति भा॒ग – धे॒ये॒न । उ॒पे॒ति । धा॒व॒ति । तस्मै॑ । ए॒व ।
 ए॒नम् । ए॒ति । वृ॒श्च॒ति । ता॒जक् । आ॒र्ति॒म् । ए॒ति । ऋ॒च्छ॒ति ।
 रो॒हिणी॑ । भ॒व॒ति । रौ॒द्री । हि । ए॒षा । दे॒व॒त॒या । स॒मृ॒द्ध्य॒ इति॑
 सं – ऋ॒द्ध्यै । स्फ्यः॑ । यू॒पः () । भ॒व॒ति । व॒ज्रः । वै । स्फ्यः॑ ।
 व॒ज्रम् । ए॒व । अ॒स्मै । प्रे॑ति । ह॒र॒ति । श॒र॒म॒य॒मि॒ति श॒र – म॒यम् ।
 ब॒र्हिः । शृ॒णा॒ति । ए॒व । ए॒नम् । वै॒भी॒द॒कः । इ॒ध्मः । भि॒न॒त्ति ।
 ए॒व । ए॒नम् । 47 (69)

(अ॒भि – ख॒लु – वृ॒ष्टिः छ॒न्द॒सा॒मे॒व र॒से॒न – प्र॒जा॒म॒व – वै॒श्व॒दे॒वा
 वै – ब्र॒ह्म॒व॑र्च॒सं – यू॒प – ए॒का॒न्न॒वि॒ंश॒तिश्च॑) (A7)

2.1.8.1

अ॒सा॒वा॒दि॒त्यो न॑ व्य॒रो॒च॒त तस्मै॑ दे॒वाः प्रा॒यश्चि॑त्ति॒मै॒च्छन् तस्मा॑ ए॒ताꣳ
 सौ॒रीꣳ श्वे॒तां व॑शा॒माऽल॑भन्त॒ तयै॑वास्मिन् रु॒च॒म॒द॒धुर्यो

ब्र॒ह्मव॑र्च॒स॒कामः॑ स्यात् तस्मा॑ ए॒तां॑ सौ॒रीं॑ श्वे॒तां व॑शामा
ल॒भेता॑मु॒मे॒वा ऽऽ*दि॒त्यं॑ स्व॒ेन॑ भा॒ग॒धे॒येनो॑प॒ धा॒वति॑ स ए॒वास्मि॑न्
ब्र॒ह्मव॑र्च॒सं द॑धाति ब्र॒ह्मव॑र्च॒स्ये॒व भ॑वति बै॒ल्वो॑ यू॒पो भ॑वत्य॒सौ-[] 48

2.1.8.1 (Padam)

अ॒सौ । आ॒दि॒त्यः । न । वी॑ति । अ॒रो॒चत॑ । तस्मै॑ । दे॒वाः ।
प्रा॒यश्चि॑त्तिम् । ऐ॒च्छन् । तस्मै॑ । ए॒ताम् । सौ॒रीम् । श्वे॒ताम् ।
व॒शाम् । ए॒ति । अ॒ल॒भ॒न्त॑ । तया॑ । ए॒व । अ॒स्मिन् । रु॒चम् ।
अ॒द॒धुः । यः । ब्र॒ह्मव॑र्च॒स॒काम॑ इति ब्र॒ह्मव॑र्च॒स – का॒मः ।
स्यात् । तस्मै॑ । ए॒ताम् । सौ॒रीम् । श्वे॒ताम् । व॒शाम् । ए॒ति । ल॒भे॒त ।
अ॒मुम् । ए॒व । आ॒दि॒त्यम् । स्व॒ेन॑ । भा॒ग॒धे॒येने॑ति भा॒ग – धे॒येन॑ ।
उ॒पे॒ति । धा॒वति॑ । सः । ए॒व । अ॒स्मिन् । ब्र॒ह्मव॑र्च॒समि॑ति
ब्र॒ह्म – व॒र्च॒सम् । द॑धाति । ब्र॒ह्मव॑र्च॒सीति॑ ब्र॒ह्म – व॒र्च॒सी । ए॒व ।
भ॑वति । बै॒ल्वः । यू॒पः । भ॑वति । अ॒सौ । 48 (50)

2.1.8.2

वा आ॒दि॒त्यो॒ यतो॑ऽजा॒यत॑ ततो॑ बि॒ल्व उ॒दति॑ष्ठ॒थ् स॒यो॒न्ये॒व ब्र॑ह्मवर्च॒सम॑व
रुन्धे॑ ब्रा॒ह्मण॑स्प॒त्यां ब॒भ्रुक॑र्णी॒मा ल॑भेता-भि॒चरन्॑ वा॒रुणं॑ द॒शक॑पालं
पु॒रस्ता॑न्-निर्व॒पेद्-व॑रु॒णेनै॒व भ्रा॑तृ॒व्यं ग्रा॑हयित्वा ब्र॒ह्मणा॑ स्तृ॒णुते॑
ब॒भ्रुक॑र्णी भवत्ये॒तद्वै ब्र॑ह्म॒णो रू॒पꣳ स॒मृद्ध्यै॑ स्फ्यो॒ यू॒पो भ॑वति॒ वज्रो॑ वै
स्फ्यो॒ वज्र॑मे॒वास्मै॒ प्र ह॑रति॒ शर॑म॒यं ब॒र्हिः शृ॒णा - [] 49

2.1.8.2 (Padam)

वै । आ॒दि॒त्यः । यतः॑ । अजा॒यत॑ । ततः॑ । बि॒ल्वः । उ॒दि॒ति ।
अ॒ति॒ष्ठत् । स॒यो॒नीति॑ स - यो॒नि । ए॒व ।
ब्र॒ह्मव॑र्च॒समि॑ति ब्र॒ह्म - व॒र्च॒सम् । अ॒वे॒ति । रु॒न्धे ।
ब्रा॒ह्मण॑स्प॒त्यामि॑ति ब्रा॒ह्मणः॑ - प॒त्याम् । ब॒भ्रुक॑र्णीमि॒ति
ब॒भ्रु - क॑र्णीम् । ए॒ति । ल॑भे॒त । अ॒भि॒चर॑न्नित्य॒भि - च॑रन् ।
वा॒रुण॑म् । द॒शक॑पालमि॒ति द॒श - क॑पालम् । पु॒रस्ता॑त् । नि॒रि॒ति ।
व॒पेत् । व॑रु॒णेन॑ । ए॒व । भ्रा॑तृ॒व्यम् । ग्रा॑हयित्वा । ब्र॒ह्मणा॑ ।
स्तृ॒णु॒ते । ब॒भ्रुक॑र्णीमि॒ति ब॒भ्रु - क॑र्णी । भ॒व॒ति । ए॒तत् ।

वै । ब्रह्मणः । रूपम् । समृद्ध्यै इति सं-ऋद्ध्यै । स्फ्यः । यूपः ।
 भवति । वज्रः । वै । स्फ्यः । वज्रम् । एव । अस्मै । प्रेति । हरति ।
 शरमयमिति शर – मयम् । बर्हिः । शृणाति । 49 (50)

2.1.8.3

-त्येवैनं वैभीदक इध्मो भिनत्येवैनं वैष्णवं वामनमा लभेत
 यं यज्ञो नोपनमेद्-विष्णुर्वै यज्ञो विष्णुमेव स्वेन भागधेयेनोप
 धावति स एवास्मै यज्ञं प्र यच्छत्युपैनं यज्ञो नमति वामनो भवति
 वैष्णवो ह्येष देवतया समृद्ध्यै त्वाष्ट्रं वडबमा लभेत पशुकामस्त्वष्टा
 वै पशूनां मिथुनानां – [] 50

2.1.8.3 (Padam)

एव । एनम् । वैभीदकः । इध्मः । भिनत्ति । एव । एनम् । वैष्णवम् ।
 वामनम् । एति । लभेत । यम् । यज्ञः । न । उपनमेदित्युप-नमेत् ।
 विष्णुः । वै । यज्ञः । विष्णुम् । एव । स्वेन ।
 भागधेयेनेति भाग – धेयेन । उपेति । धावति । सः । एव ।
 अस्मै । यज्ञम् । प्रेति । यच्छति । उपेति । एनम् । यज्ञः ।

न॒मति॑ । वा॒मनः॑ । भ॒वति॑ । वै॒ष्णवः॑ । हि॒ । ए॒षः । दे॒वतया॑ ।

समृ॒द्ध्य॒ इति॑ सं – ऋ॒द्ध्यै॑ । त्वा॒ष्ट्रम् । व॒डब॑म् । ए॒ति॑ ।

ल॒भेत॑ । प॒शुका॑म् इति॑ प॒शु – का॒मः । त्व॒ष्टा॑ । वै ।

प॒शूना॑म् । मि॒थुना॑नाम् । 50 (50)

2.1.8.4

प्र॒ज॒नयि॑ता त्व॒ष्टार॑मे॒व स्वे॑न॒ भा॒ग॒धे॒ये॒नो॒प॒ धा॑वति॒ स ए॒वा॒स्मै॑
प॒शून् मि॒थुना॑न् प्र॒ ज॒नय॑ति प्र॒जा हि॒ वा ए॒तस्मि॑न् प॒शवः॑ प्र॒वि॒ष्टा
अ॒थैष॑ पु॒मान्त्स॑न् व॒डबः॑ सा॒क्षादे॑व प्र॒जां प॒शून् व॑ रु॒न्धे मै॒त्रꣳ
श्वे॒तमा॑ ल॒भेत॑ सं॒ग्रामे॑ सँ॒यत्ते॑ स॒मय॑का॒मो मि॒त्रमे॑व स्वे॒न भा॒ग॒धे॒ये॒नो॒प
धा॑वति॒ स ए॒वैनं॑ मि॒त्रेण॑ सं॒ नय॑ति – [] 51

2.1.8.4 (Padam)

प्र॒ज॒नयि॑तेति॒ प्र – ज॒नयि॑ता । त्व॒ष्टार॑म् । ए॒व । स्वे॑न ।

भा॒ग॒धे॒ये॒नेति॑ भा॒ग – धे॒येन॑ । उ॒पेति॑ । धा॒वति॑ । सः । ए॒व ।

अ॒स्मै । प॒शून् । मि॒थुना॑न् । प्रेति॑ । ज॒नय॑ति ।

प्र॒जेति॑ प्र – जा । हि । वै । ए॒तस्मि॑न् । प॒शवः॑ ।

प्रवि॒ष्टा इति॑ प्र – वि॒ष्टाः । अथ॑ । ए॒षः । पु॒मान् । सन् ।
व॒ड॒बः । सा॒क्षादि॑ति स – अ॒क्षात् । ए॒व । प्र॒जामि॑ति प्र – जा॒म् ।
प॒शून् । अवे॑ति । रु॒न्धे । मै॒त्रम् । श्वे॒तम् । ए॒ति । ल॒भे॒त ।
स॒ङ्ग्राम॑ इति॑ सं – ग्रा॒मे । सँय॑त्त इति॑ सं – य॒त्ते ।
स॒मय॑काम इति॑ स॒मय – का॒मः । मि॒त्रम् । ए॒व । स्वे॒न ।
भा॒गधे॑येनेति॑ भा॒ग – धे॑येन । उ॒पेति॑ । धा॒वति॑ । सः । ए॒व ।
ए॒नम् । मि॒त्रेण॑ । स॒मिति॑ । न॒यति॑ । 51 (50)

2.1.8.5

वि॒शालो॑ भ॒वति॑ व्य॒वसा॑ययत्ये॒वैनं॑ प्रा॒जाप॑त्यं कृ॒ष्णमा॑ ल॒भे॒त
वृ॒ष्टि॑कामः प्र॒जाप॑तिर्वै वृ॒ष्ट्या ई॒शे प्र॒जाप॑तिमे॒व स्वे॒न भा॒गधे॑येनो॒प
धा॒वति॑ स ए॒वास्मै॑ प॒र्जन्यं॑ व॒र्षय॑ति कृ॒ष्णो भ॒वत्ये॑तद्वै वृ॒ष्ट्यै रू॒पं
रू॒पेणै॑व वृ॒ष्टि॑म॒व रु॒न्धे श॒बलो॑ भ॒वति॑ वि॒द्युत॑मे॒वास्मै॑ ज॒नयि॑त्वा
व॒र्षय॑त्यवा॒शृङ्गो॑ भ॒वति॑ वृ॒ष्टिमे॒वास्मै॑ नि य॒च्छति॑ () । 52

2.1.8.5 (Padam)

वि॒शाल॑ इति॑ वि – शालः॑ । भवति॑ । व्य॒वसाय॑यतीति॑
 वि – अ॒वसाय॑यति । ए॒व । ए॒नम् । प्रा॒जाप॑त्यमिति॑ प्राजा – प॒त्यम् ।
 कृ॒ष्णम् । ए॒ति । ल॒भेत॑ । वृ॒ष्टि॑काम इति॑ वृष्टि॑ – का॒मः ।
 प्रा॒जाप॑तिरिति॑ प्राजा – प॒तिः । वै । वृ॒ष्ट्याः॑ । ई॒शे । प्रा॒जाप॑तिमिति॑
 प्राजा – प॒तिम् । ए॒व । स्वे॒न । भा॒गधे॑येनेति॑ भाग॑-धेये॒न । उपे॑ति ।
 धा॒वति॑ । सः । ए॒व । अ॒स्मै । पर्ज॑न्यम् । वर्॒षय॑ति । कृ॒ष्णः ।
 भव॑ति । ए॒तत् । वै । वृ॒ष्ट्यै॑ । रू॒पम् । रू॒पेण॑ । ए॒व । वृ॒ष्टिम् ।
 अ॒वेति॑ । रु॒न्धे । श॒बलः॑ । भव॑ति । वि॒द्युत॑मिति॑ वि – द्यु॒तम् । ए॒व ।
 अ॒स्मै । ज॒नयि॑त्वा । वर्॒षय॑ति । अ॒वाशृ॑ङ्गः । भव॑ति । वृ॒ष्टिम् ।
 ए॒व । अ॒स्मै । नी॒ति । य॒च्छति॑ () । 52 (50)

(अ॒सौ – शृ॒णाति॑ – मि॒थुना॑नां – न॒यति॑ – य॒च्छति॑) (A8)

2.1.9.1

वरु॑णꣳ सुषु॑वाणम॒न्नाद्यं॑ नो॒पान॑मथ् स ए॒तां वा॑रु॒णीं कृ॒ष्णां
 वा॑शामप॒श्यत् ताꣳ स्वा॑यै दे॒वता॑या आल॑भत॒ ततो॑ वै

तमन्नाद्-यमुपानमद्-यमलमन्नाद्याय सन्तमन्नाद्यं नोपनमेथ् स एतां
वारुणीं कृष्णां वशामा लभेत वरुणमेव स्वेन भागधेयेनोप धावति
स एवास्मा अन्नं प्र यच्छत्यन्नाद – [] 53

2.1.9.1 (Padam)

वरुणम् । सुषुवाणम् । अन्नाद्यमित्यन्न – अद्यम् । न । उपेति ।
अनमत् । सः । एताम् । वारुणीम् । कृष्णाम् । वशाम् । अपश्यत् ।
ताम् । स्वायै । देवतायै । एति । अलभत । ततः । वै । तम् ।
अन्नाद्यमित्यन्न – अद्यम् । उपेति । अनमत् । यम् । अलम् ।
अन्नाद्यायेत्यन्न – अद्याय । सन्तम् । अन्नाद्यमित्यन्न – अद्यम् । न ।
उपनमेदित्युप-नमेत् । सः । एताम् । वारुणीम् । कृष्णाम् । वशाम् ।
एति । लभेत । वरुणम् । एव । स्वेन । भागधेयेनेति भाग – धेयेन ।
उपेति । धावति । सः । एव । अस्मै । अन्नम् । प्रेति । यच्छति ।
अन्नाद इत्यन्न – अदः । 53 (50)

2.1.9.2

ए॒व भ॒वति॑ कृ॒ष्णा भ॒वति॑ वा॒रुणी॑ ह्ये॒षा दे॒वत॑या॒ समृ॑द्ध्यै
मै॒त्रञ् श्वे॒तमा॑ ल॒भेत॑ वा॒रुणं॑ कृ॒ष्णम॒पां च॑ औष॒धीनां॑ च॒ स॒न्धाव॑न्न॒कामो॑
मै॒त्रीर्वा औष॑धयो॒ वा॒रुणी॑रापोऽ॒पां च॑ ख॒लु वा औष॑धीनां च॒ र॒समु॑प
जी॒वामो॑ मि॒त्राव॑रुणावे॒व स्वे॒न भा॒गधे॑ये॒नोप॑ धा॒वति॑ ता॒वेवा॒स्मा अ॒न्नं
प्र॒यच्छ॑तोऽन्ना॒द ए॒व भव॑ – [] 54

2.1.9.2 (Padam)

ए॒व । भ॒वति॑ । कृ॒ष्णा । भ॒वति॑ । वा॒रुणी॑ । हि । ए॒षा । दे॒वत॑या ।
समृ॑द्ध्यै इति सं – ऋ॒द्ध्यै । मै॒त्रम् । श्वे॒तम् । ए॒ति । ल॒भेत॑ ।
वा॒रुणम् । कृ॒ष्णम् । अ॒पाम् । च । औष॑धीनाम् । च । स॒न्धावि॑ति
सं – धौ । अ॒न्नका॑म इत्य॒न्न – का॑मः । मै॒त्रीः । वै । औष॑धयः ।
वा॒रुणीः । आ॒पः । अ॒पाम् । च । ख॒लु । वै । औष॑धीनाम् । च ।
र॒सम् । उ॒पेति॑ । जी॒वामः॑ । मि॒त्राव॑रुणा॒विति॑ मि॒त्रा – व॑रुणौ । ए॒व ।
स्वे॒न । भा॒गधे॑ये॒नेति॑ भा॒ग – धे॑ये॒न । उ॒पेति॑ । धा॒वति॑ । तौ । ए॒व ।

अ॒स्मै । अ॒न्नम् । प्रेति॑ । य॒च्छतः॑ । अ॒न्नाद॑ इत्य॒न्न – अ॒दः । ए॒व ।

भ॒वति॑ । 54 (50)

2.1.9.3

–त्य॒पां चो॒षधी॑नां च स॒न्धावा॑ ल॒भत॑ उ॒भय॑स्या–व॒रुद्ध्यै॑वि॒शाखो॑
यू॒पो भ॒वति॑ द्वे ह्ये॒ते दे॒वते॑ स॒मृद्ध्यै॑ मै॒त्रञ् श्वे॒तमा॑ ल॒भेत॑ वा॒रुणं॑
कृ॒ष्णं ज्यो॑गामयावीयन् मै॒त्रो भ॒वति॑ मि॒त्रेणै॒वास्मै॑ व॒रुणञ् श॒मय॑ति
यद्–वा॒रुणः॑ सा॒क्षादे॒वैनं॑ व॒रुण॑पा॒शान् मुञ्च॑त्यु॒त यदी॒तासु॑र्भ॒वति॑
जी॒वत्ये॒व दे॒वा वै पु॒ष्टिं ना॒विन्दन् – [] 55

2.1.9.3 (Padam)

अ॒पाम् । च । ओ॒षधी॑नाम् । च । स॒न्धावि॑ति सं–धौ । ए॒ति । ल॒भते॑ ।
उ॒भय॑स्य । अ॒व॒रुद्ध्य॑ इत्य॒व – रु॒द्ध्यै । वि॒शाख॑ इति वि–शा॒खः ।
यू॒पः । भ॒वति॑ । द्वे इति॑ । हि । ए॒ते इति॑ । दे॒वते॑ इति॑ ।
स॒मृद्ध्य॑ इति सं – ऋ॒द्ध्यै । मै॒त्रम् । श्वे॒तम् । ए॒ति । ल॒भेत॑ ।
वा॒रुणम् । कृ॒ष्णम् । ज्यो॑गामयावीति ज्योक् – आ॒मया॑वी ।
यत् । मै॒त्रः । भ॒वति॑ । मि॒त्रेण॑ । ए॒व । अ॒स्मै । व॒रुणम् । श॒मय॑ति ।

यत् । वारुणः । साक्षादिति स – अक्षात् । एव । एनम् ।
वरुणपाशादिति वरुण – पाशात् । मुञ्चति । उत । यदि ।
इतासुरितीत-असुः । भवति । जीवति । एव । देवाः । वै । पुष्टिम् ।
न । अविन्दन् । 55 (50)

2.1.9.4

तां मिथुने ऽपश्यन् तस्यां न समराधयन्ता-वश्विना-वब्रूता-मावयोर्वा
एषा मैतस्यां वदध्वमिति साश्विनोरेवाभवद्यः पुष्टिकामः स्यात् स
एतामाश्विनीं यमीं वशामा लभेताऽश्विनावेव स्वेन भागधेयेनोप
धावति तावेवास्मिन् पुष्टिं धत्तः पुष्यति प्रजया पशुभिः । 56

2.1.9.4 (Padam)

ताम् । मिथुने । अपश्यन् । तस्याम् । न । समिति । अराधयन् ।
तौ । अश्विनौ । अब्रूताम् । आवयोः । वै । एषा । मा । एतस्याम् ।
वदध्वम् । इति । सा । अश्विनोः । एव । अभवत् । यः ।
पुष्टिकाम इति पुष्टि – कामः । स्यात् । सः । एताम् । आश्विनीम् ।
यमीम् । वशाम् । एति । लभेत । अश्विनौ । एव । स्वेन ।

भा॒ग॒धे॒ये॒ने॒ति॒ भा॒ग॒ – धे॒ये॒न॒ । उ॒पे॒ति॒ । धा॒व॒ति॒ । तौ॒ । ए॒व॒ ।
 अ॒स्मि॒न् । पु॒ष्टि॒म् । ध॒त्तः॑ । पु॒ष्य॒ति॒ । प्र॒ज॒ये॒ति॒ प्र॒ – ज॒या॑ ।
 प॒शु॒भि॒रि॒ति॒ प॒शु॒ – भिः॑ । 56 (45) (अ॒न्नादौ॑ – ऽन्ना॒द॒ ए॒व॒ भ॑व॒त्य॒ –
 वि॒न्दन् – पञ्च॑च॒त्वारि॑ंश॒च्च) (A9)

2.1.10.1

आ॒श्वि॒नं॑ धू॒म्र॒ल॒ला॒म॒मा॒ ल॒भे॒त॒ यो॒ दु॒र्ब्रा॑ह्म॒णः॑ सो॒मं॒ पि॒पा॒से॒द॒श्वि॒नौ॒ वै
 दे॒वा॒ना॒-म॒सो॒म॒पा॒वा॒स्तां॑ तौ॒ प॒श्चा॒ सो॒म॒पी॒थं॑ प्रा॒प्नु॒ता॒-म॒श्वि॒ना॒वे॒त॒स्य॑
 दे॒व॒ता॒ यो॒ दु॒र्ब्रा॑ह्म॒णः॑ सो॒मं॒ पि॒पा॒स॒त्य॒श्वि॒ना॒वे॒व॒ स्वे॒न॒ भा॒ग॒धे॒ये॒नो॒प॑
 धा॒व॒ति॒ता॒वे॒वा॒स्मै॑ सो॒म॒पी॒थं॑ प्र॒ य॒च्छ॒त॒ उपै॑न॒ꣳ सो॒म॒पी॒थो॒ न॒म॒ति॒ यद्-
 धू॒म्रो॒ भ॒व॒ति॒ धू॒म्रि॒मा॒ण॒-मे॒वा॒स्मा॒दप॑ ह॒न्ति॒ ल॒ला॒मो॑ – [] 57

2.1.10.1 (Padam)

आ॒श्वि॒नम् । धू॒म्र॒ल॒ला॒म॒मि॒ति॒ धू॒म्र॒ – ल॒ला॒मम् । ए॒ति॒ ।
 ल॒भे॒त॒ । यः॑ । दु॒र्ब्रा॑ह्म॒ण इ॒ति॒ दुः॑ – ब्रा॒ह्म॒णः॑ । सो॒मम् ।
 पि॒पा॒से॒त् । अ॒श्वि॒नौ॑ । वै॒ । दे॒वा॒ना॒म् । अ॒सो॒म॒पा॒वि॒त्य॒सो॒म॒ – पौ॒ ।

आ॒स्ताम् । तौ । प॒श्चा । सोम॑पी॒थमि॑ति सोम – पी॒थम् । प्रेति॑ ।
 आ॒प्नु॒ताम् । अ॒श्विनौ॑ । ए॒तस्य॑ । दे॒वता॑ । यः ।
 दु॒र्ब्रा॒ह्मण॑ इति दुः– ब्रा॒ह्मणः॑ । सोम॑म् । पिपा॑सति । अ॒श्विनौ॑ ।
 ए॒व । स्वे॒न । भा॒गधे॑ये॒नेति॑ भा॒ग – धे॑ये॒न । उपेति॑ । धा॒वति॑ । तौ ।
 ए॒व । अ॒स्मै । सोम॑पी॒थमि॑ति सोम–पी॒थम् । प्रेति॑ । य॒च्छतः॑ ।
 उपेति॑ । ए॒नम् । सोम॑पी॒थ इति॑ सोम – पी॒थः । न॒मति॑ । यत् ।
 धू॒म्रः । भ॒वति॑ । धू॒म्रिमा॑णम् । ए॒व । अ॒स्मात् । अपेति॑ । ह॒न्ति ।

ल॒लामः॑ । 57 (50)

2.1.10.2

भ॒वति॑ मु॒खत॑ ए॒वास्मि॑न् ते॒जो॑ दधाति वा॒यव्यं॑ गो॒मृ॒गमा॑ ल॒भेत॑
 यम॑ज॒घ्निवा॑ꣳ स॒मभि॑शꣳ सै॒युर॑पू॒ता वा ए॒तं वा॑गृच्छति
 यम॑ज॒घ्निवा॑ꣳ स॒मभि॑शꣳ स॒न्ति नै॒ष ग्रा॒म्यः प॒शुर्ना॑रण्यो यद्–गो॒मृ॒गो
 ने॒वैष॑ ग्रा॒मे ना॑रण्ये यम॑ज॒घ्निवा॑ꣳ स॒मभि॑शꣳ स॒न्ति वा॒युर्वै दे॒वानां॑
 प॒वि॒त्रं वा॒युमे॒व स्वे॒न भा॒गधे॑ये॒नोप॑ धा॒वति॑ स ए॒वै – [] 58

2.1.10.2 (Padam)

भवति । मुखतः । एव । अस्मिन् । तेजः । दधाति । वायव्यम् ।
गोमृगमिति गो – मृगम् । एति । लभेत । यम् । अजघ्निवाऽसम् ।
अभिशाऽस्युरित्यभि – शाऽस्युः । अपूता । वै । एतम् । वाक् ।
ऋच्छति । यम् । अजघ्निवाऽसम् ।
अभिशाऽसन्तीत्यभि – शाऽसन्ति । न । एषः । ग्राम्यः । पशुः । न ।
आरण्यः । यत् । गोमृग इति गो – मृगः । न । इव । एषः । ग्रामे ।
न । अरण्ये । यम् । अजघ्निवाऽसम् ।
अभिशाऽसन्तीत्यभि-शाऽसन्ति । वायुः । वै । देवानाम् । पवित्रम् ।
वायुम् । एव । स्वेन । भागधेयेनेति भाग-धेयेन । उपेति । धावति ।
सः । एव । 58 (50)

2.1.10.3

-नं पवयति पराची वा एतस्मै व्युच्छन्ती व्युच्छति तमः पाप्मानं
प्रविशति यस्याश्विने शस्यमाने सूर्यो नाऽऽविर्भवति सौर्यं बहुरूपमा
लभेतामुमेवादित्यः स्वेन भागधेयेनोप धावति स एवास्मात् तमः

पाप्मान॑मप॒ हन्ति॑ प्र॒तीच्य॑स्मै व्यु॒च्छन्ती॑ व्यु॒च्छत्य॑प॒ तमः॑

पाप्मान॑ हते । 59

2.1.10.3 (Padam)

ए॒नम् । प॒वय॑ति । प॒रा॒ची । वै । ए॒तस्मै॑ । व्यु॒च्छन्ती॑ति
वि-उ॒च्छन्ती॑ । वी॒ति । उ॒च्छति॑ । तमः॑ । पाप्मान॑म् । प्रेति॑ । वि॒शति॑ ।
यस्य॑ । आ॒श्विने॑ । श॒स्यमा॑ने । सूर्यः॑ । न । आ॒विः । भव॑ति ।
सौर्य॑म् । बहु॒रूपमि॑ति बहु – रूपम् । एति॑ । ल॒भेत॑ । अमु॑म् । ए॒व ।
आ॒दित्य॑म् । स्वे॒न । भा॒गधे॑येनेति भा॒ग – धे॑येन । उ॒पेति॑ ।
धा॒वति॑ । सः । ए॒व । अ॒स्मात् । तमः॑ । पाप्मान॑म् । अपेति॑ ।
हन्ति॑ । प्र॒तीची॑ । अ॒स्मै । व्यु॒च्छन्ती॑ति वि – उ॒च्छन्ती॑ । वी॒ति ।
उ॒च्छति॑ । अपेति॑ । तमः॑ । पाप्मान॑म् । हते॑ । 59 (46)

(ल॒लामः॑ – स ए॒व – षट्च॑त्वारि॒ंशच्च॑) (A10)

2.1.11.1

इन्द्रं॑ वो॒ विश्व॑तस्परी॒ न्द्रं नरो॑ मरुतो॒ यद्ध॑ वो॒ दिवो॑ या वः॒ शर्म॑ ।
भरो॑ष्विन्द्रं॒ सु॒हव॑ सु॒हवाम॑हे ऽहो॒मुच॑ सु॒कृतं॑ दै॒व्यं ज॑नं ।

अ॒ग्निं मि॒त्रं व॑रु॒णञ् सा॒तये॑ भ॒गं द्या॒वापृ॑थि॒वी म॒रुतः॑ स्व॒स्तये॑ ।

म॒मत्तु॑ नः॒ परि॑ज्मा व॒सर्.हा॑ म॒मत्तु॑ वा॒तो अ॒पां वृ॑ष॒ण्वान् ।

शि॒शी॒तमि॑न्द्रा॒पर्व॑ता यु॒वं न॒स्तन्नो॑ वि॒श्वे व॑रि॒वस्य॑न्तु दे॒वाः ।

प्रि॒या वो॑ नाम – [] 60

2.1.11.1 (Padam)

इ॒न्द्रम् । वः॑ । वि॒श्वतः॑ । प॒रीति॑ । इ॒न्द्रम् । नरः॑ । म॒रुतः॑ । यत् ।

ह । वः॑ । दि॒वः । या । वः॑ । श॒र्म । भ॒रेषु॑ । इ॒न्द्रम् ।

सु॒हव॑मि॒ति सु॑ – ह॒वम् । ह॒वाम॑हे । अ॒हो॒मुच॑मित्य॒हः – मु॒चम् ।

सु॒कृत॑मि॒ति सु॑ – कृ॒तम् । दै॒व्यम् । ज॒नम् । अ॒ग्निम् । मि॒त्रम् ।

व॒रुण॑म् । सा॒तये॑ । भ॒गम् । द्या॒वा पृ॑थि॒वी इति॑ द्या॒वा – पृ॑थि॒वी ।

म॒रुतः॑ । स्व॒स्तये॑ । म॒मत्तु॑ । नः॑ । परि॑ज्मेति परि – ज्मा । व॒सर्.हा॑ ।

म॒मत्तु॑ । वा॒तः । अ॒पाम् । वृ॑ष॒ण्वानि॑ति वृ॑ष॒ण् – वा॒न् । शि॒शी॒तम् ।

इ॒न्द्रा॒पर्व॑ते॒तीन्द्रा॑ – प॒र्वता॑ । यु॒वम् । नः॑ । तत् । नः॑ । वि॒श्वे ।

व॒रि॒वस्य॑न्तु । दे॒वाः । प्रि॒या । वः॑ । नाम । 60 (50)

2.1.11.2

हु॒वे तु॒राणां॑ । आ यत् तृ॒पन्म॑रुतो वाव॒शानाः॑ ।
श्रि॒यसे॑ कं भा॒नुभिः॑ सं मि॒मिक्षि॑रे ते र॒श्मिभि॑स्त ऋ॒क्भिः॑ सु॒खाद॑यः ।
ते वा॒शीम॑न्त इ॒ष्मिणो॑ अ॒भीर॑वो वि॒द्रे प्रि॒यस्य॑ मा॒रुत॑स्य धा॒म्नः॑ ।
अ॒ग्निः प्र॑थ॒मो व॑सु॒भिर्नो॑ अ॒व्यात् सो॒मो रु॒द्रेभि॑र॒भि र॑क्षतु त्मना॑ ॥
इन्द्रो॑ म॒रुद्भिर् ऋ॒तुधा॑ कृ॒णोत्वादि॒त्यैर्नो॑ वरु॒णः सꣳ शि॑शातु ।
सं नो॑ दे॒वो व॑सु॒भिर॒ग्निः सꣳ – [] 61

2.1.11.2 (Padam)

हु॒वे । तु॒राणा॑म् । ए॒ति । यत् । तृ॒पत् । म॒रुतः॑ । वाव॒शानाः॑ ।
श्रि॒यसे॑ । कम् । भा॒नुभि॑रिति भा॒नु-भिः॑ । स॒मिति॑ । मि॒मिक्षि॑रे । ते ।
र॒श्मिभि॑रिति र॒श्मि – भिः॑ । ते । ऋ॒क्भिरि॑त्यृक् – भिः॑ ।
सु॒खाद॑य इति सु – खाद॑यः । ते । वा॒शीम॑न्त इति
वा॒शि – म॒न्तः॑ । इ॒ष्मिणः॑ । अ॒भीर॑वः । वि॒द्रे । प्रि॒यस्य॑ । मा॒रुत॑स्य ।
धा॒म्नः॑ । अ॒ग्निः । प्र॑थ॒मः । व॑सु॒भिरिति॑ व॒सु-भिः॑ । नः॑ । अ॒व्यात् ।
सो॒मः । रु॒द्रेभिः॑ । अ॒भीति॑ । र॒क्षतु॑ । त्मना॑ ॥ इन्द्रः॑ ।

म॒रु॒द्भि॒रिति॑ म॒रुत् - भिः॑ । ऋ॒तु॒धे॒त्यृ॒तु - धा । कृ॒णो॒तु ।

आ॒दि॒त्यैः । नः॑ । व॒रु॒णः । स॒मि॒ति । शि॒शा॒तु । स॒मि॒ति । नः॑ ।

दे॒वः । व॒सु॒भि॒रिति॑ व॒सु - भिः॑ । अ॒ग्निः । स॒मि॒ति । 61 (50)

2.1.11.3

सो॒म॒स्त॒नू॒भी रु॒द्रि॒या॒भिः । स॒मि॒न्द्रो म॒रु॒द्भि॒र्य॒ज्ञि॒यैः स॒मा॒दि॒त्यैर्नो॑
व॒रु॒णो अ॒जि॒ज्ञि॒पत् । य॒थाऽऽदि॒त्या व॒सु॒भिः सं॒ब॒भू॒वुर्म॒रु॒द्भि॒रु॒द्राः
स॒म॒जा॒न॒ता॒भि । ए॒वा त्रि॒णाम॒न्न-ह॑णी॒यमा॒ना वि॒श्वे दे॒वाः स॒म॒न॒सो
भ॒वन्तु॑ । कु॒त्रा चि॒द्यस्य॑ स॒मृ॒तौ र॒ण्वा न॒रो नृ॑ष॒दने॑ । अ॒र्ह॒न्तश्चि॒द्-
य॒मि॒न्ध॒ते सं॒ज॒न॒य॒न्ति ज॒न्त॒वः । सं य॒दि॒षो व॒नाम॑हे स॒ ह॒व्या
मा॒नु॒षा॒णां । उ॒त द्यु॒म्न॒स्य श॒व॒स - [] 62

2.1.11.3 (Padam)

सो॒मः । त॒नू॒भिः । रु॒द्रि॒या॒भिः । स॒मि॒ति । इ॒न्द्रः । म॒रु॒द्भि॒रिति॑
म॒रुत् - भिः॑ । य॒ज्ञि॒यैः । स॒मि॒ति । आ॒दि॒त्यैः । नः॑ । व॒रु॒णः ।
अ॒जि॒ज्ञि॒पत् । य॒था । आ॒दि॒त्याः । व॒सु॒भि॒रिति॑ व॒सु - भिः॑ ।
स॒म्ब॒भू॒वुरिति॑ सं - ब॒भू॒वुः । म॒रु॒द्भि॒रिति॑ म॒रुत् - भिः॑ । रु॒द्राः ।

स॒म॒जान॑तेति॒ सं – अ॒जान॑त् । अ॒भि । ए॒वा । त्रि॒णाम॑न्निति॒
 त्रि – ना॒मन् । अ॒ह॒णी॒यमा॑नाः । वि॒श्वे॑ । दे॒वाः । स॒मन॑स इति॒
 स – म॒नसः॑ । भ॒वन्तु॑ । कु॒त्र । चि॒त् । य॒स्य । स॒मृता॑विति॒
 सं-ऋ॒तौ । र॒ण्वाः । नरः॑ । नृ॒षद॑न इति॒ नृ-स॑दने । अ॒र्ह॑न्तः ।
 चि॒त् । य॒म् । इ॒न्ध॒ते । स॒ञ्ज॒नय॑न्तीति॒ सं – ज॒नय॑न्ति । ज॒न्तवः॑ ।
 स॒मिति॑ । य॒त् । इ॒षः । व॒नाम॑हे । स॒मिति॑ । ह॒व्या । मा॒नुषा॑णाम् ।
 उ॒त । द्यु॒म्नस्य॑ । श॒वसः॑ । 62 (50)

2.1.11.4

ऋ॒तस्य॑ र॒श्मि॒मा द॑दे । य॒ज्ञो दे॒वाना॑म् प्र॒त्येति॑ सु॒म्नमा॑दि॒त्यासो॑ भ॒वता॑
 मृ॒डय॑न्तः । आ वो॒र्वाची॑ सु॒मति॑र्व॒वृत्त्या॑द॒र् हो॒श्चि॒द्या व॑रि॒वोवि॑त्तरा॒ऽसत् ।
 शु॒चिर॑पः सू॒यव॑सा अ॒दब्ध॑ उप॒ क्षेति॑ वृ॒द्धव॑याः सु॒वीरः॑ । न॒कि॒ष्टं
 घ्न॑न्त्यन्ति॒तो न॑ दू॒राद्य॑ आ॒दि॒त्यानां॑ भ॒वति॑ प्र॒णीतौ॑ । धा॒रय॑न्त आ॒दि॒त्यासो॑
 ज॒गत्स्थ॑ा दे॒वा वि॒श्वस्य॑ भु॒वन॑स्य गो॒पाः । दी॒र्घा॒धियो॑ र॒क्षमा॑णा- [] 63

2.1.11.4 (Padam)

ऋ॒तस्य॑ । र॒श्मि॑म् । ए॒ति॑ । द॒दे॑ । य॒ज्ञः॑ । दे॒वाना॑म् । प्र॒तीति॑ ।
ए॒ति॑ । सु॒म्न॑म् । आ॒दि॒त्यासः॑ । भ॒वत॑ । मृ॒डय॑न्तः । ए॒ति॑ । वः ।
अ॒र्वाची॑ । सु॒मति॑रिति सु – म॒तिः॑ । व॒वृ॒त्यात् । अ॒होः॑ । चि॒त् ।
या । व॒रि॒वो॒वित्त॑रेति व॒रि॒वो॒वित् – त॒रा । अ॒सत् । शु॒चिः॑ । अ॒पः ।
सू॒यव॑सा इति सु – य॒वसाः॑ । अ॒द॒ब्धः॑ । उ॒पेति॑ । क्षे॒ति॑ ।
वृ॒द्धव॑या इति वृ॒द्ध – व॒याः॑ । सु॒वीर॑ इति सु – वी॒रः॑ ।
न॒किः॑ । तम् । घ्न॒न्ति॑ । अ॒न्तितः॑ । न । दू॒रात् । यः । आ॒दि॒त्याना॑म् ।
भ॒वति॑ । प्र॒णी॒ता॒विति॑ प्र – नी॒तौ । धा॒रय॑न्तः । आ॒दि॒त्यासः॑ ।
ज॒गत् । स्थाः॑ । दे॒वाः । वि॒श्वस्य॑ । भु॒वन॑स्य । गो॒पा इति॑ गो-पाः ।
दी॒र्घा॒धिय॑ इति दी॒र्घ – धि॒यः॑ । र॒क्षमा॑णाः । 63 (50)

2.1.11.5

अ॒सुर्य॑मृ॒तावा॑न-श्च॒यमा॑ना ऋ॒णानि॑ । ति॒स्रो भू॑मी॒र्धा॒रय॑न् त्री॒रु॒त द्यू॑न्
त्री॒णि व्र॑ता वि॒दथे॑ अ॒न्तरे॑षां । ऋ॒तेना॑ऽऽदि॒त्या म॒हि वो॑ म॒हित्वं॑
त॒दर्य॑मन् वरु॒ण मि॒त्र चा॒रु । त्या॒न्तु क्ष॒त्रिया॑ अव॑ आ॒दि॒त्यान्

याचिषामहे । सु॒मृ॒डीका॑ अ॒भिष्ट॑ये । न दक्षि॒णा विचि॑किते न स॒व्या न
प्राची॑नमादित्या नोत पश्चा । पा॒क्या चिद्व॑सवो धी॒र्या चिद् – [] 64

2.1.11.5 (Padam)

असु॒र्यम् । ऋ॒तावा॑न इत्यृ॒त – वा॒नः । चय॑मानाः । ऋ॒णानि॑ । ति॒स्रः ।
भूमीः॑ । धा॒रय॑न् । त्रीन् । उ॒त । द्यून् । त्री॑णि । व्र॒ता । वि॒दथे॑ ।
अ॒न्तः । ए॒षाम् । ऋ॒तेन॑ । आ॒दि॒त्याः । म॒हि । वः । म॒हि॒त्वमि॑ति
म॒हि – त्वम् । तत् । अ॒र्यम॑न् । व॒रुण॑ । मि॒त्र । चा॒रु । त्यान् । नु ।
क्ष॒त्रिया॑न् । अ॒वः । आ॒दि॒त्यान् । याचि॑षामहे ।
सु॒मृ॒डीका॑निति सु – मृ॒डिका॑न् । अ॒भिष्ट॑ये । न । दक्षि॒णा । वी॒ति ।
चि॒किते॑ । न । स॒व्या । न । प्राची॑नम् । आ॒दि॒त्याः । न । उ॒त ।
पश्चा । पा॒क्या । चि॒त् । व॒सवः॑ । धी॒र्या । चि॒त् । 64 (50)

2.1.11.6

–यु॒ष्मानी॑तो अ॒भयं॑ ज्योति॑रश्यां । आ॒दि॒त्याना॑मव॒सा नू॒तने॑न
सक्षी॑महि श॒र्मणा॑ श॒न्तमे॑न । अ॒नागा॑स्त्वे अ॒दिति॑त्वे तु॒रास॑ इ॒मं य॑ज्ञं
दध॑तु श्रो॒षमा॑णाः । इ॒मं मे॑ व॒रुण॑ श्रु॒धी ह॑वम॒द्या च॑ मृ॒डय॑ ।

त्वाम॑व॒स्यु॒रा च॑के । तत्त्वा॑ या॒मि ब्र॒ह्म॒णा व॒न्द॒मा॒न-स्त॒दा शा॒स्ते
यज॑मा॒नो ह॒विर्भिः॑ । अ॒हे॒ड॒मा॒नो व॒रु॒णे॒ह बो॒ध्यु॒रु॒श॒स् मा न॒ आयुः॑
प्र॒मो॒षीः । 65

2.1.11.6 (Padam)

युष्मा॑नी॒तः । अ॒भय॑म् । ज्यो॑तिः । अ॒श्या॑म् । आ॒दि॒त्याना॑म् । अ॒व॒सा ।
नू॒त॒ने॒न । स॒क्षी॑म॒हि । श॒र्म॒णा । श॒न्त॒मे॒नेति॑ शं - त॒मे॒न ।
अ॒ना॒गा॒स्त्व इ॒त्य॒ना॒गाः-त्वे । अ॒दि॒तित्व॑ इ॒त्य॒दि॒ति - त्वे । तु॒रा॒सः ।
इ॒मम् । य॒ज्ञम् । द॒ध॒तु । श्रो॑ष॒मा॒णाः । इ॒मम् । मे॒ । व॒रु॒ण ।
श्रु॒धि । ह॒वम् । अ॒द्य । च॒ । मृ॒ड॒य । त्वा॑म् । अ॒व॒स्युः । ए॒ति ।
च॒के । तत् । त्वा॒ । या॒मि । ब्र॒ह्म॒णा । व॒न्द॒मा॒नः । तत् । ए॒ति ।
शा॒स्ते । यज॑मा॒नः । ह॒विर्भि॑रि॒ति ह॒विः - भिः॑ । अ॒हे॒ड॒मा॒नः ।
व॒रु॒ण । इ॒ह । बो॒धि । उ॒रु॒श॒स्ते॒त्यु॒रु - श॒स् ।
मा । नः॑ । आ॒युः । प्रे॑ति । मो॒षीः । 65 (49)

पद पाठे (वाक्य सहित) – द्वितीयकाण्डे – प्रथमप्रश्नः

(ना॒मा – अ॒ग्निः स॒ꣳ – श॒वसो॑ – र॒क्षमा॑णा – धी॒र्या॑ चिदे – का॒न्न
पञ्चा॑शच्च) (A11)

Prasna Korvai with starting Padams of 1 to 11 Anuvaakams :-

(वा॒यव्यं॑ – प्रा॒जप॑तिस्ता वरु॒णं – दे॒वासु॑रा ए॒ष्व – सा॒वादि॑त्यो
दश॑र्षभा-मिन्द्रो॑ वल॒स्य – बा॒र्हस्प॑त्यं – व॑षट्कारो –
ऽसौ॒सौरीं॑ – व॑रुण – मा॒श्विन – मि॒न्द्रं वो॑ नर – ए॒काद॑श)

Korvai with starting Padams of 1, 11, 21 Series of Panchaatis :-

(वा॒यव्यं॑ – मा॒ग्नेयीं॑ कृ॒ष्णग्री॑वी – म॒सावादि॑त्यो – वा अ॒होरा॑त्राणि
– व॑षट्कारः – प्र॒जन॑यिता – हु॒वे तु॒राणां॑ – पञ्च॑षष्टिः)

First and Last Padam of First Prasnam of Kandam 2:-

(वा॒यव्यं॑ – प्र॒मोषीः॑)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे द्वितीयकाण्डे प्रथमः

प्रश्नः समाप्तः ॥

पद पाठे (वाक्य सहित) – द्वितीयकाण्डे – प्रथमप्रश्नः

Details of Panchati and Padam for Kandam 2 – Prasanam 1 – TS 2.1

	Panchati	Padams
Anuvakam 1	6	313
Anuvakam 2	9	443
Anuvakam 3	5	265
Anuvakam 4	8	392
Anuvakam 5	7	353
Anuvakam 6	5	253
Anuvakam 7	7	369
Anuvakam 8	5	250
Anuvakam 9	4	195
Anuvakam 10	3	146
Anuvakam 11	6	299
Total →	65	3278

Notes:

- Please refer to the book “TS Kandam 1” and “TS 1.1 Pada Paatam with Vaakyam” for notes and conventions used in this Compilation.
- Please download our vedic compilations from our web site www.vedavms.in.